

## ॥ उदकशान्ति-मन्त्राः ॥

कृणुष्व पाजुः प्रसितिं न पृथ्वीं याहि राजेवामवाꣳ इभेन।  
 तृष्णीमनु प्रसितिं द्रूणानोऽस्तासि विध्यं रक्षसस्तपिष्ठैः। तव  
 भ्रमासं आशुया पतन्त्यनु स्पृश धृषता शोशुचानः। तपूꣳष्यग्रे  
 जुह्वा पतङ्गानसन्दितो वि सृज विष्वगुल्काः। प्रति स्पशो  
 वि सृज तूर्णितमो भवा पायुर्विशो अस्या अदब्धः। यो नो  
 दूरे अघशꣳसो यो अन्त्यग्रे मार्किष्टे व्यथिरा दधर्षीत्॥१॥

उदग्रे तिष्ठ प्रत्याऽऽतनुष्व न्यमित्राꣳ ओषतात्तिग्महेते। यो  
 नो अरातिꣳ समिधान चक्रे नीचा तं धक्ष्यतसं न शुष्कम्।  
 ऊर्ध्वो भव प्रति विध्याध्यस्मदाविष्कृणुष्व दैव्याꣳन्यग्रे। अव  
 स्थिरा तनुहि यातुजूनां जामिमजामिं प्र मृणीहि शत्रून्। स  
 ते जानाति सुमतिं यविष्ठ य ईवते ब्रह्मणे गातुमैरत्॥२॥

विश्वाꣳन्यस्मै सुदिनानि रायो द्युम्नान्यर्यो वि दुरो अभि द्यौत्।  
 सेदग्रे अस्तु सुभगः सुदानुर्यस्त्वा नित्येन हविषा य उक्थैः।  
 पिप्रीषति स्व आयुषि दुरोणे विश्वेदस्मै सुदिना साऽसदिष्टिः।  
 अर्चामि ते सुमतिं घोष्यर्वाख्सं ते वावाता जरतामियङ्गीः॥३॥

स्वश्वाꣳस्त्वा सुरथा मर्जयेमास्मे क्षत्राणि धारयेरनु द्यून्।  
 इह त्वा भूर्या चरेदुप त्मन्दोषावस्तर्दीदिवाꣳसमनु द्यून्।  
 कीडन्तस्त्वा सुमनसः सपेमाभि द्युम्ना तस्थिवाꣳसो  
 जनानाम्। यस्त्वा स्वश्वः सुहिरण्यो अग्न उपयाति

वसु॑मता॒ रथे॑न। तस्य॑ त्रा॒ता भ॑वसि॒ तस्य॑ सखा॒  
यस्तं॑ आति॒थ्यमा॑नुष॒गजु॑जोषत्। म॒हो रु॑जामि ब॒न्धुता॑  
वचो॑भिस्तन्मा॑ पि॒तुर्गोत॑मा॒दन्वि॑याय॥४॥

त्वं नो॑ अ॒स्य वच॑सश्चिकिद्धि॒ होत॑र्यविष्ठ सु॒क्रतो॑ द॒मूनाः।  
अस्व॑प्रजस्तरण॑यः सु॒शेवा॒ अत॑न्द्रासोऽवृ॒का अश्र॑मिष्ठाः। ते  
पा॒यवः॑ स॒ध्रियं॑श्चो नि॒षद्या॑ऽग्ने तव॑ नः पा॒न्त्वमू॑रा। ये पा॒यवो॑  
मा॒मते॒यं ते॑ अ॒ग्ने पश्य॑न्तो अ॒न्धं दु॑रि॒तादर॑क्षन्। र॒रक्ष॑  
ता॒न्त्सुकृ॑तो वि॒श्ववै॑दा दि॒प्सन्त॑ इ॒द्रिप॑वो ना ह॑ दे॒भुः॥५॥

त्वया॑ व॒यः स॑ध॒न्यस्त्वो॒तास्त॑व प्रणी॑त्यश्याम॒ वाजा॑न्। उ॒भा  
शः॑सा॒ सूद॑य सत्यता॑तेऽनु॒ष्टुया॑ कृ॒णुह्य॑हयाण। अ॒या ते॑ अ॒ग्ने  
स॒मिधा॑ वि॒धेम॒ प्रति॒ स्तोम॑ः श॒स्यमा॑नं गृ॒भाय। दहा॑ऽशसो॑  
र॒क्षसः॑ पा॒ह्यस्मान्द्रु॑हो नि॒दो मि॑त्रम॒हो अव॑द्यात्। र॒क्षो॒हणं॑  
वा॒जिन॒माऽऽजि॑धर्मि मि॒त्रं प्रथि॑ष्ठमुप॑ या॒मि श॑र्म। शिशा॑नो  
अ॒ग्निः क्र॑तु॒भिः स॑मि॒द्धः स नो॒ दिवा॒ स रि॑षः पा॑तु न॒क्तम्॥६॥

वि ज्योति॑षा बृ॒हता॒ भा॑त्य॒ग्निरा॒विर्वि॑श्वानि कृ॒णुते॑ म॒हि॒त्वा।  
प्रादे॑वीर्मा॒याः स॑हते दु॒रेवाः॑ शि॒शी॒ते शृ॑ङ्गे र॒क्षसे॑ वि॒निक्षे॑।  
उ॒त स्वा॒नासो॑ दि॒विष॑न्त्व॒ग्नेस्ति॒ग्मायु॑धा र॒क्षसे॑ ह॒न्त॒वा  
उ॑। मदे॑ चिदस्य॒ प्ररु॑जन्ति॒ भामा॒ न व॑रन्ते परि॒बाधो॑  
अदे॑वीः॥७॥[१.२.१४]

इन्द्रं॑ वो वि॒श्वत॒स्परि॒ हवा॑महे जने॑भ्यः। अ॒स्माक॑मस्तु

केवलः। इन्द्रं नरो नेमधिता हवन्ते यत्पार्या युनजते  
 धियस्ताः। शूरो नृपाता शवसश्चकान आ गोमति व्रजे भजा  
 त्वं नः। इन्द्रियाणि शतक्रतो या ते जनेषु पञ्चसु। इन्द्र  
 तानि त आ वृणे। अनु ते दायि मह इन्द्रियाय सत्रा ते  
 विश्वमनु वृत्रहत्यै। अनु क्षत्रमनु सहो यजत्रेन्द्र देवेभिरनु  
 ते नृषह्यै॥८॥

आ यस्मिन्त्सप्त वासवास्तिष्ठन्ति स्वारुहो यथा। ऋषिर्ह  
 दीर्घश्रुतम इन्द्रस्य घर्मो अतिथिः। आमासु पक्वमैरय आ  
 सूर्यः रोहयो दिवि। घर्म न सामन्तपता सुवृक्तिभिर्जुष्टं  
 गिर्वणसे गिरः। इन्द्रमिद्राथिनो बृहदिन्द्रमर्केभिरर्किणः। इन्द्रं  
 वाणीरनूषत। गायन्ति त्वा गायत्रिणोऽर्चन्त्यर्कमर्किणः॥९॥

ब्रह्माणस्त्वा शतक्रतुवृद्धः शमिव येमिरे। अहोमुचे प्र  
 भरेमा मनीषामोषिष्ठदावन्ने सुमतिं गृणानाः। इदमिन्द्र प्रति  
 हव्यं गृभाय सत्याः सन्तु यजमानस्य कामाः। विवेष  
 यन्मा धिषणा जजान स्तवै पुरा पार्यादिन्द्रमहः। अहंसो  
 यत्र पीपरद्यथा नो नावेव यान्तमुभये हवन्ते। प्र सम्राजं  
 प्रथममध्वराणामहोमुचं वृषभं यज्ञियानाम्॥१०॥

अपां नपातमश्विना हयन्तमस्मिन्नर इन्द्रियं धत्तमोजः। वि न  
 इन्द्र मृधो जहि नीचा यच्छ पृतन्यतः। अधस्पदं तर्मी कृधि  
 यो अस्मा अभिदासति। इन्द्र क्षत्रमभि वाममोजोऽजायथा

वृषभ चर्षणीनाम्। अपा॑ऽनुदो॒ जन॑ममित्र॒यन्त॑मु॒रुं दे॒वेभ्यो॑  
अकृ॒णोरु॒ लोक॑म्। मृ॒गो न भी॑मः कु॒चरो॒ गिरि॑ष्ठाः प॒राव॑त  
आ ज॑गामा॒ पर॑स्याः॥११॥

सृ॒कः स॒शाय॑ प॒विमि॑न्द्र ति॒ग्मं वि शत्रू॑न् ताडि॒ वि  
मृ॒धो नु॑दस्व। वि शत्रू॑न् वि मृ॒धो नु॑द वि वृ॒त्रस्य॑  
ह॒नू रु॒ज। वि म॒न्युमि॑न्द्र भा॒मितो॑ऽमि॒त्रस्या॑भि॒दास॑तः।  
त्रा॒तार॑मि॒न्द्रम॑वि॒तार॑मि॒न्द्रः ह॒वेह॑वे सु॒हवः॑ शू॒रमि॑न्द्रम्। हु॒वे  
नु श॒क्रं पु॑रु॒हूत॑मि॒न्द्रः स्व॒स्ति नो॑ म॒घवा॑ धा॒त्विन्द्रः॑। मा तै  
अ॒स्याः स॑ह॒साव॑न् परि॒ष्टाव॑धाय॒ भूम॑ हरि॒वः प॒रादै॑॥१२॥

त्राय॑स्व नोऽवृ॒केभि॑र्व॒रूथै॑स्तव॒ प्रि॒यासः॑ सूरि॒षु स्या॑म।  
अ॒न॒वस्ते॒ रथ॑म॒श्वाय॑ तक्ष॒न् त्वष्टा॑ व॒ज्रं पु॑रु॒हूत॑ द्यु॒मन्त॑म्।  
ब्र॒ह्माण॑ इ॒न्द्रं म॒ह्यन्तो॑ अ॒र्कैर॑व॒र्धय॑न्न॒हये॑ ह॒न्त॒वा उ॑।  
वृ॒ष्णे य॑त्ते वृ॒षणो॑ अ॒र्कम॑र्चा॒निन्द्र॑ ग्रा॒वा॒णो अ॒दि॒तिः  
स॒जोषाः॑। अ॒न॒श्वासो॑ ये प॒वयो॑ऽर॒था इ॒न्द्रैषि॑ता अ॒भ्यव॑र्तन्त॒  
दस्यू॑न्॥१७॥[१.६.१२]

यत॑ इ॒न्द्र भ॑या॒महे॒ ततो॑ नो॒ अ॒भयं॑ कृ॒धि। म॒घव॑ञ्छृ॒ग्धि तव॑  
तन्न॑ ऊ॒तये॑ वि॒द्विषो॑ वि॒मृधो॑ ज॒हि। स्व॒स्ति॒दा वि॒शस्प॑तिर्वृ॒त्रहा॑  
वि॒मृधो॑ व॒शी। वृ॒षेन्द्रः॑ पु॒र ए॒तु नः॑ स्व॒स्ति॒दा अ॒भय॑ङ्क॒रः।  
म॒हाः इ॒न्द्रो व॑ज्र॒बाहुः॑ षोड॒शी श॑र्म यच्छ॒तु। स्व॒स्ति नो॑  
म॒घवा॑ करोतु॒ हन्तु॑ पा॒प्मानं॑ योऽस्मा॑न् द्वेष्टि॑। स॒जोषा॑

इन्द्र॑ स॒ग॒णो म॒रुद्भिः॑ सोमं॑ पिब वृ॒त्रह॑ञ्छूर वि॒द्वान्। ज॒हि  
शत्रूँ॑रप॒मृ॒धौनु॒द॒स्वा॒थाभ॑यं कृणु हि वि॒श्वतो॑ नः॥१८॥

ये दे॒वाः पु॒रः स॒दोऽग्नि॑ नै॒त्रा रक्षो॑ह॒ण॒स्ते नः॑ पा॒न्तु ते  
नो॑ऽव॒न्तु तेभ्यो॑ नम॒स्तेभ्यः॑ स्वाहा॒ ये दे॒वा दक्षि॑ण॒सदो॑ य॒मनै॑त्रा  
रक्षो॑ह॒ण॒स्ते नः॑ पा॒न्तु ते नो॑ऽव॒न्तु तेभ्यो॑ नम॒स्तेभ्यः॑ स्वाहा॒  
ये दे॒वाः प॑श्चात् स॒दः स॒वितृ॑ नै॒त्रा रक्षो॑ह॒ण॒स्ते नः॑ पा॒न्तु  
ते नो॑ऽव॒न्तु तेभ्यो॑ नम॒स्तेभ्यः॑ स्वाहा॒ ये दे॒वा उ॑त्तर॒सदो॑  
वरु॑णनेत्रा रक्षो॑ह॒ण॒स्ते नः॑ पा॒न्तु ते नो॑ऽव॒न्तु तेभ्यो॑ नम॒स्तेभ्यः॑  
स्वाहा॒ ये दे॒वा उ॑परि॒षदो॑ बृह॒स्पति॑नेत्रा रक्षो॑ह॒ण॒स्ते नः॑ पा॒न्तु  
ते नो॑ऽव॒न्तु तेभ्यो॑ नम॒स्तेभ्यः॑ स्वाहा॒ऽग्नये॑ रक्षो॑घ्ने स्वाहा॑  
य॒माय॑ रक्षो॑घ्ने स्वाहा॑ स॒वित्रे॑ रक्षो॑घ्ने स्वाहा॑ वरु॑णाय रक्षो॑घ्ने  
स्वाहा॑ बृह॒स्पतये॑ दु॒व॒स्पते॑ रक्षो॑घ्ने स्वाहा॑॥१९॥

अ॒ग्निरायु॑ष्मान्त्स वन॒स्पति॑भिरायु॑ष्मान्तेन॒ त्वाऽऽयु॑षा-  
ऽऽयु॑ष्मन्तं करोमि॒ सोम॑ आयु॑ष्मान्त्स ओष॑धीभिरायु॑ष्मान्तेन॒  
त्वाऽऽयु॑षाऽऽयु॑ष्मन्तं करोमि॒ यज्ञ॑ आयु॑ष्मान्त्स  
दक्षि॑णाभिरायु॑ष्मान्तेन॒ त्वाऽऽयु॑षाऽऽयु॑ष्मन्तं करोमि॒  
ब्रह्मा॑यु॑ष्मन्तद् ब्रा॒ह्मणै॑रायु॑ष्मन्तेन॒ त्वाऽऽयु॑षाऽऽयु॑ष्मन्तं  
करोमि॒ दे॒वा आयु॑ष्मन्त॒स्तेऽमृ॑तेनायु॑ष्मन्त॒स्तेन॒ त्वा-  
ऽऽयु॑षाऽऽयु॑ष्मन्तं करोमि॥२०॥

या वा॑मिन्द्रा वरु॒णा य॒त॒व्या॑ त॒नू॒स्तये॑मम॑ ह॒सो मु॑ञ्चतम्। या  
वा॑मिन्द्रा वरु॒णा स॒ह॒स्या॑ त॒नू॒स्तये॑मम॑ ह॒सो मु॑ञ्चतम्। या

वा॒मिन्द्रा वरुणा रक्ष॒स्यां त॒नूस्तये॒मम॑ ह॒सो मुञ्च॑तम्। या  
वा॒मिन्द्रा वरुणा तेज॒स्यां त॒नूस्तये॒मम॑ ह॒सो मुञ्च॑तम्॥ २१॥

यो वा॒मिन्द्रा वरुणाव॒ग्नौ स्ना॒म॒स्तं वा॒मे॒ते॒नाव॑ यजे॒ यो वा॒मिन्द्रा  
वरुणा द्वि॒पात्सु॑ प॒शुषु॑ स्ना॒म॒स्तं वा॒मे॒ते॒नाव॑ यजे॒ यो वा॒मिन्द्रा  
वरुणा चतु॑ष्पात्सु॒ स्ना॒म॒स्तं वा॒मे॒ते॒नाव॑ यजे॒ यो वा॒मिन्द्रा  
वरुणा गो॒ष्ठे स्ना॒म॒स्तं वा॒मे॒ते॒नाव॑ यजे॒ यो वा॒मिन्द्रा वरुणा  
गृ॒हेषु॑ स्ना॒म॒स्तं वा॒मे॒ते॒नाव॑ यजे॒ यो वा॒मिन्द्रा वरुणाप्सु॑  
स्ना॒म॒स्तं वा॒मे॒ते॒नाव॑ यजे॒ यो वा॒मिन्द्रा वरु॒णौष॑धीषु॒ स्ना॒म॒स्तं  
वा॒मे॒ते॒नाव॑ यजे॒ यो वा॒मिन्द्रा वरुणा वन॒स्पति॑षु॒ स्ना॒म॒स्तं  
वा॒मे॒ते॒नाव॑ यजे॥ २२॥

अ॒ग्ने यश॑स्विन् यश॑से म॒म॒र्प॒येन्द्रा॑वती॒मप॑चितीमि॒हाव॑ह।  
अ॒यं मूर्धा॑ प॒रमे॑ष्ठी सु॒वर्चाः॑ स॒मा॒ना॒नामु॒त्त॒म॒श्लो॒को अ॒स्तु॥  
भ॒द्रं प॑श्यन्त॒ उप॑सेदुर॒ग्रे तपो॑ दी॒क्षामृ॑षयः सु॒व॒र्वि॒दः। ततः॑  
क्ष॒त्रं ब॒ल॒मो॒जंश्च॑ जा॒तं तद॒स्मै दे॒वा अ॒भि स॒न्न॑मन्तु॥  
धा॒ता वि॑धा॒ता प॑र॒मो॒त॒स॒न्धृक् प्र॒जाप॑तिः प॒रमे॑ष्ठी वि॒राजा॑।  
स्तो॒मा॒श्छ॒न्दा॑सि नि॒विदो॑म आ॒हुरे॒त॒स्मै रा॒ष्ट्रम॑भि॒सन्न॑माम॥  
अ॒भ्याव॑र्तध्व॒मुप॑मेत॒साक॑ म॒यः॑ शा॒स्ताऽधि॑पतिर्वो अ॒स्तु।  
अ॒स्य वि॒ज्ञान॑मनु॒स॑र॒भध्व॑मि॒मं प॒श्चाद॑नु जी॒वाथ॑ सर्वे॥ २३॥

## ॥ राष्ट्रभृतम् ॥

ऋ॒ता॒षा॒डृत॒धा॒मा॒ग्नि॒र्गन्ध॒र्वस्त॒स्योष॑ध॒योऽप्सर॒स ऊ॒र्जो॒ नाम॒  
स इ॒दं ब्र॒ह्मक्ष॑त्रं पा॒तु ता इ॒दं ब्र॒ह्मक्ष॑त्रं पा॒न्तु तस्मै॒ स्वाहा॒  
ताभ्यः॒ स्वाहा॑

स॒ऋ॒हितो॒ वि॒श्वसा॑मा॒ सूर्यो॑ गन्ध॒र्वस्त॒स्य म॒रीच॑योऽप्सर॒स  
आ॒युवो॒ नाम॒

स इ॒दं ब्र॒ह्मक्ष॑त्रं पा॒तु ता इ॒दं ब्र॒ह्मक्ष॑त्रं पा॒न्तु तस्मै॒ स्वाहा॒  
ताभ्यः॒ स्वाहा॑

सुषु॒म्णः सूर्य॑रश्मिश्च॒न्द्रमा॑ गन्ध॒र्वस्त॒स्य नक्ष॑त्राण्य॒ऽप्सर॒सो  
बे॒कुर॑यो॒ नाम॒

स इ॒दं ब्र॒ह्मक्ष॑त्रं पा॒तु ता इ॒दं ब्र॒ह्मक्ष॑त्रं पा॒न्तु तस्मै॒ स्वाहा॒  
ताभ्यः॒ स्वाहा॑

भु॒ज्युः सु॒पर्णो॒ य॒ज्ञो गन्ध॒र्वस्त॒स्य दक्षि॑णा अ॒प्सर॒सस्त॒वा  
नाम॒

स इ॒दं ब्र॒ह्मक्ष॑त्रं पा॒तु ता इ॒दं ब्र॒ह्मक्ष॑त्रं पा॒न्तु तस्मै॒ स्वाहा॒  
ताभ्यः॒ स्वाहा॑

प्र॒जाप॑तिर्वि॒श्वक॑र्मा॒ मनो॑ गन्ध॒र्वस्त॒स्य क्सा॑मा॒न्य॒प्सर॒सो  
व॒ह्नयो॒ नाम॒

स इ॒दं ब्र॒ह्मक्ष॑त्रं पा॒तु ता इ॒दं ब्र॒ह्मक्ष॑त्रं पा॒न्तु तस्मै॒ स्वाहा॒  
ताभ्यः॒ स्वाहे॑षिरो

वि॒श्वव्य॑चा॒ वातो॑ गन्ध॒र्वस्त॒स्यापो॑ऽप्सर॒सो मु॒दा नाम॒

स इदं ब्रह्मक्षत्रं पातु ता इदं ब्रह्मक्षत्रं पा॑न्तु तस्मै स्वाहा  
ताभ्यः स्वाहा॑।

भुवनस्य पते यस्य त उपरि गृहा इह च। स नो  
रा॒स्वाज्या॑निः रा॒यस्पोषः॑ सु॒वीर्यः॑ संवत्स॒रीणाः॑  
स्व॒स्तिम्। (स्वाहा॑)।

पर॒मे॒ष्ठ्यधि॑पतिर्मृत्युर्गन्धर्वस्तस्य विश्वमप्सरसो भुवो नाम  
स इदं ब्रह्मक्षत्रं पातु ता इदं ब्रह्मक्षत्रं पा॑न्तु तस्मै स्वाहा  
ताभ्यः स्वाहा॑

सु॒क्षितिः सु॒भूति॑र्भद्रकृत्सुव॑र्वान्प॒र्जन्यो गन्ध॑र्वस्तस्य  
वि॒द्युतो॑ऽप्सरसो रुचो नाम  
स इदं ब्रह्मक्षत्रं पातु ता इदं ब्रह्मक्षत्रं पा॑न्तु तस्मै स्वाहा  
ताभ्यः स्वाहा॑

दूरे है॒तिर॑मृ॒डयो मृत्यु॑र्गन्धर्वस्तस्य प्र॒जा अ॑प्सरसो भी॒रवो॑  
नाम

स इदं ब्रह्मक्षत्रं पातु ता इदं ब्रह्मक्षत्रं पा॑न्तु तस्मै स्वाहा  
ताभ्यः स्वाहा॑

चा॒रुः कृ॒पण॑का॒शी का॒मो गन्ध॑र्वस्तस्या॒धयो॑ऽप्सरसः  
शो॒चय॑न्ती॒र्नाम

स इदं ब्रह्मक्षत्रं पातु ता इदं ब्रह्मक्षत्रं पा॑न्तु तस्मै स्वाहा  
ताभ्यः स्वाहा॑

स नो भुवनस्य पते यस्य त उपरि गृहा इह च। उ॒रु



ब्रह्मणेऽस्मै क्षत्राय महि शर्म यच्छ (स्वाहा)॥  
 नमो अस्तु सर्पेभ्यो ये के च पृथिवीमनु। ये अन्तरिक्षे  
 ये दिवि तेभ्यः सर्पेभ्यो नमः॥ येऽदो रौचने दिवो ये वा  
 सूर्यस्य रश्मिषु। येषामप्सु सदः कृतं तेभ्यः सर्पेभ्यो नमः॥  
 या इषवो यातुधानानां ये वा वनस्पतीरनु। ये वाऽवटेषु  
 शेरते तेभ्यः सर्पेभ्यो नमः॥

## ॥ पञ्चचोडाः ॥

अयं पुरो हरिकेशः सूर्यरश्मिस्तस्य रथगृत्सश्च रथौजाश्च  
 सेनानिग्रामण्यौ पुञ्जिकस्थला च कृतस्थला चाप्सरसौ  
 यातुधाना हेती रक्षांसि प्रहेतिस्तेभ्यो नमस्ते नो मृडयन्तु  
 ते यं द्विष्मो यश्च नो द्वेष्टि तं वो जम्भे दधामि।

अयं दक्षिणा विश्वकर्मा तस्य रथस्वनश्च रथे चित्रश्च  
 सेनानिग्रामण्यौ मेनका च सहज्या चाप्सरसौ दृक्खवः  
 पशवो हेतिः पौरुषेयोवधः प्रहेतिस्तेभ्यो नमस्ते नो मृडयन्तु  
 ते यं द्विष्मो यश्च नो द्वेष्टि तं वो जम्भे दधामि।

अयं पश्चाद्विश्वव्यासास्तस्य रथप्रोतश्चासंमरथश्च सेनानिग्रामण्यौ  
 प्रम्लोचन्ती चानुम्लोचन्ती चाप्सरसौ सर्पा हेतिर्व्याघ्राः  
 प्रहेतिस्तेभ्यो नमस्ते नो मृडयन्तु ते यं द्विष्मो यश्च नो द्वेष्टि  
 तं वो जम्भे दधामि।

अयमुत्तरात्संयद्वसुस्तस्य सेनजिच्च सुषेणश्च सेनानिग्रामण्यौ

वि॒श्वाचीं च घृ॒ताचीं चाप्स॒रसा॒वापो॑ हे॒तिर्वा॒तः प्रहै॑ति॒स्तेभ्यो॑  
नम॒स्ते नो॑ मृडयन्तु ते यं द्वि॒ष्मो यश्च॑ नो॒ द्वेष्टि॑ तं वो॒ जम्भे॑  
दधामि।

अ॒यमु॒पर्य॑र्वा॒ग्वंसु॒स्तस्य॑ ता॒क्ष्यश्चा॒रि॑ष्टनेमिश्च से॒नानि॒-  
ग्रा॒म॒ण्या॑वुर्वशीं च पू॒र्वचि॑त्तिश्चाप्स॒रसौ॑ वि॒द्युद्धे॒तिर॑व॒-  
स्फूर्ज॑न्प्रहै॒तिस्तेभ्यो॑ नम॒स्ते नो॑ मृडयन्तु ते यं द्वि॒ष्मो यश्च॑  
नो॒ द्वेष्टि॑ तं वो॒ जम्भे॑ दधामि।

## ॥ अप्रतिरथम् ॥

(तैत्तिरीयसंहितायां काण्डः - ४/प्रश्नः - ६/अनुवाकः - ४)

आ॒शुः शि॒शा॒नो वृ॒ष॒भो न यु॒ध्मो घ॑नाघ॒नः क्षो॑भ॒णश्च॑र॒षणी॑नाम्।  
स॒ङ्ग॒न्द॒नोऽनि॑मिष ए॒कवी॒रः श॒त९ से॒ना अ॑जयत् सा॒कमि॒न्द्रः।  
स॒ङ्ग॒न्द॒नेना॑निमिषेण॑ जि॒ष्णुना॑ यु॒त्का॒रेण॑ दु॒श्च॒वने॑न धृ॒ष्णुना॑।  
तदि॒न्द्रेण॑ जयत॒ तत्स॑ह॒ध्वं यु॒धो नर॑ इ॒षुह॑स्तेन॒ वृ॒ष्णा। स  
इ॒षुह॑स्तैः स॒निष॑ङ्गिभिर्वशी स॒ं॒स्र॑ष्टा स यु॒ध इ॒न्द्रो ग॑णेन।  
स॒ं॒सृ॑ष्टजि॒त्सोम॑पा बा॒हुश॑ध्यूर्ध्वध॑न्वा प्र॒ति॒हि॒ताभि॑रस्ता॑।

बृ॒ह॒स्प॒ते परि॑ दी॒या र॑थेन र॒क्षो॒हाऽमि॑त्रा॒ं॒ अप॒बाध॑मानः।  
प्र॒भ॒ञ्ज॒न्त्सेना॑ः प्रमृ॒णो यु॒धा ज॑यन्त॒स्माक॑मे॒ध्यवि॑ता र॒थाना॑म्।  
गो॒त्रभि॑दं गो॒विदं॑ वज्र॒बाहुं॑ जयन्त॒मज्मं॑ प्रमृ॒णन्त॒मोज॑सा।  
इ॒मं॒ संजा॑ता॒ अनु॑ वी॒रय॑ध्वमि॒न्द्रं॒ सखा॑योऽनु स॒ं॒  
र॑भध्वम्। ब॒ल॒वि॒ज्ञायः॑ स्थवि॒रः प्र॑वी॒रः स॑ह॒स्वान् वा॒जी

सहमान उग्रः। अभिर्वीरो अभिसत्त्वा सहोजा जैत्रमिन्द्र  
रथमा तिष्ठ गोवित्। अभि गोत्राणि सहसा गाहमानोऽदायो  
वीरः शतमन्युरिन्द्रः।

दुश्श्रवणः पृतनाषाड्युध्योऽस्माकं सेना अवतु प्र युत्सु।  
इन्द्र आसां नेता बृहस्पतिर्दक्षिणा यज्ञः पुर एतु सोमः।  
देवसेनानामभिभञ्जतीनां जयन्तीनां मरुतो यन्त्वग्रे। इन्द्रस्य  
वृष्णो वरुणस्य राज्ञ आदित्यानां मरुता शर्ध उग्रम्।  
महामनसां भुवनच्यवानां घोषो देवानां जयतामुदस्थात्।  
अस्माकमिन्द्रः समृतेषु ध्वजेष्वस्माकं या इषवस्ता जयन्तु।

अस्माकं वीरा उत्तरे भवन्त्वस्मानु देवा अवता हवेषु।  
उद्धर्षय मघवन्नायुधान्युत् सत्त्वंनां मामकानां महासि।  
उद्धृत्रहन् वाजिनां वाजिनान्युद्रथानां जयतामेतु घोषः। उप  
प्रेत जयता नरः स्थिरा वः सन्तु बाहवः। इन्द्रो वः शर्म  
यच्छत्त्वनाधृष्या यथाऽसंथ। अवसृष्टा परा पत् शरव्ये  
ब्रह्मसंशिता।

गच्छामित्रान् प्रविश मैषां कं चनोच्छिषः। मर्माणि ते  
वर्मभिश्छादयामि सोमस्त्वा राजाऽमृतैनाभिवस्ताम्।  
उरोर्वरीयो वरिवस्ते अस्तु जयन्तं त्वामनु मदन्तु देवाः।  
यत्र बाणाः सम्पतन्ति कुमार विशिखा इव। इन्द्रो नस्तत्र  
वृत्रहा विश्वाहा शर्म यच्छतु॥

शं च मे मयश्च मे प्रियं च मेऽनुकामश्च मे कामश्च मे  
 सौमनसश्च मे भद्रं च मे श्रेयश्च मे वस्यश्च मे यशश्च मे  
 भगश्च मे द्रविणं च मे यन्ता च मे धर्ता च मे क्षेमश्च मे  
 धृतिश्च मे विश्वं च मे महश्च मे संविच्च मे ज्ञात्रं च मे सूश्च मे  
 प्रसूश्च मे सीरं च मे लयश्च मे ऋतं च मेऽमृतं च मेऽयक्ष्मं  
 च मेऽनामयच्च मे जीवातुश्च मे दीर्घायुत्वं च मेऽनमित्रं च  
 मेऽभयं च मे सुगं च मे शयनं च मे सूषा च मे सुदिनं च  
 मे॥

## ॥विहव्यम्॥

ममाग्ने वर्चो विहवेष्वस्तु वयं त्वेन्धानास्तनुवं पुषेम। मह्यं  
 नमन्तां प्रदिशश्चतस्रस्त्वयाऽध्यक्षेण पृतना जयेम। मम  
 देवा विहवे सन्तु सर्व इन्द्रावन्तो मरुतो विष्णुरग्निः।  
 ममान्तरिक्षमुरु गोपमस्तु मह्यं वातः पवतां कामे अस्मिन्।  
 मयि देवा द्रविणमा यजन्तां मय्याशीरस्तु मयि देवहूतिः।  
 दैव्या होतारा वनिषन्तु पूर्वेऽरिष्टाः स्याम तनुवां सुवीराः।  
 मह्यं यजन्तु मम यानि हव्याऽऽकूतिः सत्या मनसो मे  
 अस्तु। एनो मा नि गां कतमच्चनाहं विश्वे देवासो अधि  
 वोचता मे। देवीः षडुर्वीरुरु णः कृणोत विश्वे देवास  
 इह वीरयध्वम्। मा हाँस्महि प्रजया मा तनूभिर्मा रंधाम  
 द्विषते सोम राजन्। अग्निर्मन्युं प्रतिनुदन् पुरस्ताददब्धो

गोपाः परि पाहि नस्त्वम्। प्रत्यश्चो यन्तु निगुतः  
 पुनस्तेऽमैषां चित्तं प्रबुधा वि नेशत्। धाता धातृणां भुवनस्य  
 यस्पतिर्देवः सवितारमभिमातिषाऽहम्। इमं यज्ञमश्विनोभा  
 बृहस्पतिर्देवाः पान्तु यजमानं न्यर्थात्। उरुव्यचा नो महिषः  
 शर्म यः सदस्मिन् हवे पुरुहूतः पुरुक्षु। स नः प्रजायै हर्यश्व  
 मृडयेन्द्र मा नो रीरिषो मा परा दाः। ये नः सपत्ना अप ते  
 भवन्त्विन्द्राग्निभ्यामव बाधामहे तान्। वसवो रुद्रा आदित्या  
 उपरिस्पृश मोग्रं चेत्तारमधिराजमक्रन्। अर्वाश्चमिन्द्रममुतो  
 हवामहे यो गोजिद्धनजिदश्वजिद्यः। इमं नो यज्ञं विह्वे  
 जुषस्वास्य कुर्मो हरिवो मेदिनं त्वा॥

## ॥ मृगारम् ॥

अग्नेर्मन्वे प्रथमस्य प्रचेतसो यं पाञ्चजन्यं बहवः समिन्धते।  
 विश्वस्यां विशि प्रविविशिवाः संमीमहे स नो मुञ्चत्वः हंसः।  
 यस्येदं प्राणं निमिषद्यदेजति यस्य जातं जनमानं  
 च केवलम्। स्तौम्यग्निं नाथितो जोहवीमि स नो  
 मुञ्चत्वः हंसः।

इन्द्रस्य मन्ये प्रथमस्य प्रचेतसो वृत्रघ्नः स्तोमा उप  
 मामुपागुः। यो दाशुषः सुकृतो हवमुप गन्ता स नो  
 मुञ्चत्वः हंसः। यः सङ्ग्रामं नयति संवशी युधे यः पुष्टानि  
 सः सृजति त्रयाणि। स्तौमीन्द्रं नाथितो जोहवीमि स नो

मुञ्चत्व॑हंसः।

मन्वे वा॑ मि॒त्रावरु॑णा तस्य॑ वि॒त्त॒ः सत्यौ॑जसा दृ॒हणा॒ यं  
नुदे॑थै। या राजा॑न॒ः सर॑थं या॒थ उ॑ग्रा ता नो॑ मुञ्चत॒माग॑सः।  
यो वा॒ः रथं॑ ऋ॒जुर॑श्मिः स॒त्यध॑र्मा मिथु॑श्चरन्तमुप॒याति॑  
दूष॑यन्। स्तौमि॑ मि॒त्रावरु॑णा नाथि॒तो जो॑हवीमि॒ तौ नो॑  
मुञ्चत॒माग॑सः।

वा॒योः संवि॑तुर्वि॒दथा॑नि मन्महे॒ यावा॑त्मन्वद्विभृ॒तो यौ च॒  
रक्ष॑तः। यौ विश्व॑स्य परि॒भू ब॑भूवतुस्तौ नो॑ मुञ्चत॒माग॑सः।  
उप॒ श्रेष्ठा॑ न आ॒शिषो॑ दे॒वयो॑र्धमे॒ अस्थि॑रन्। स्तौमि॑ वा॒युः  
संवि॑तारं नाथि॒तो जो॑हवीमि॒ तौ नो॑ मुञ्चत॒माग॑सः।  
र॒थीत॑मौ रथी॒नाम॑ह ऊ॒तये॑ शु॒भं ग॑मिष्ठौ सु॒यमे॑भिर॒श्वैः।  
ययो॑र्वा दे॒वौ दे॒वेष्व॑नि॒शित॑मोजस्तौ नो॑ मुञ्चत॒माग॑सः।  
यदया॑तं वह॒तुः सूर्या॑या॒स्त्रिच॑क्रेण॒ स॒ः स॒दमि॑च्छमा॒नौ।  
स्तौमि॑ दे॒वाव॒श्विनौ॑ नाथि॒तो जो॑हवीमि॒ तौ नो॑ मुञ्चत॒माग॑सः।  
म॒रुता॑ मन्वे॒ अधि॑ नो ब्रुवन्तु॒ प्रेमां॑ वाचं॒ विश्वा॑मवन्तु॒ विश्वे॑।  
आ॒शून् हु॑वे सु॒यमा॑नूतये॒ ते नो॑ मुञ्चन्त्वे॒नसः॑। ति॒ग्ममा॑युधं  
वी॒डित॑ः सह॒स्वद्वि॒व्यः शर्धः॑ पृ॒तना॑सु जि॒ष्णु। स्तौमि॑  
दे॒वान्म॑रुतो॑ नाथि॒तो जो॑हवीमि॒ ते नो॑ मुञ्चन्त्वे॒नसः॑।  
दे॒वाना॑ मन्वे॒ अधि॑ नो ब्रुवन्तु॒ प्रेमां॑ वाचं॒ विश्वा॑मवन्तु॒  
विश्वे॑। आ॒शून् हु॑वे सु॒यमा॑नूतये॒ ते नो॑ मुञ्चन्त्वे॒नसः॑। यदि॑दं  
मांऽभि॒शोच॑ति॒ पौरु॑षेयेण॒ दैव्ये॑न। स्तौमि॑ विश्वा॑न्दे॒वान्ना॑थि॒तो

जोहवीमि ते नो मुञ्चन्त्वेनसः।

अनु नोऽद्यानुमतिर्यज्ञं देवेषु मन्यताम्। अग्निश्च हव्यवाहनो  
भवतां दाशुषे मयः। अन्विदनुमते त्वं मन्यासै शं च नः  
कृधि। ऋत्वे दक्षाय नो हि नु प्रण आयूँषि तारिषः।  
वैश्वानरो न ऊत्या प्र यातु परावतः। अग्निरुक्थेन वाहसा॥  
पृष्ठो दिवि पृष्ठो अग्निः पृथिव्यां पृष्ठो विश्वा ओषधीराविवेश।  
वैश्वानरसहसा पृष्ठो अग्निः स नो दिवा स रिषः पातु  
नक्तम्। ये अप्रथेताममितेभिरोजोभिर्ये प्रतिष्ठे अभवतां  
वसूनाम्।

स्तौमि द्यावापृथिवी नाथितो जोहवीमि ते नो मुञ्चतमँहसः।  
उर्वी रोदसी वरिवः कृणोतं क्षेत्रस्य पत्नी अधि नो ब्रूयातम्।  
स्तौमि द्यावापृथिवी नाथितो जोहवीमि ते नो मुञ्चतमँहसः।  
यत्ते वयं पुरुषत्रा यविष्ठाऽविद्वाँसश्चकृमा कच्चनाऽऽगः।  
कृधी स्वस्माँ अदितेरनागा व्येनाँसि शिश्रथो विष्वगग्ने।  
यथा ह तद्वसवो गौर्यं चित्पदि पिताममुञ्चता यजत्राः। एवा  
त्वमस्मत्प्र मुञ्चा व्यँहुः प्रातार्यग्ने प्रतरां न आयुः॥

## ॥ सर्पाहुतिः ॥

समीची नामासि प्राची दिक्तस्यांस्तेऽग्निरधिपतिरसितो  
रक्षिता यश्चाधिपतिर्यज्ञं गोप्ता ताभ्यां नमस्तौ नो मृडयतां  
ते यं द्विष्मो यश्च नो द्वेष्टि तं वां जम्भे

दधाम्योजस्विनी नामासि दक्षिणा दित्तस्यास्तु इन्द्रोऽधि-  
 पतिः पृदाकू रक्षिता यश्चाधिपतिर्यश्च गोप्ता ताभ्यां नमस्तौ  
 नो मृडयतां ते यं द्विष्मो यश्च नो द्वेष्टि तं वां जम्भे दधामि  
 प्राची नामासि प्रतीची दित्तस्यास्ते सोमोऽधिपतिः स्वजो  
 रक्षिता यश्चाधिपतिर्यश्च गोप्ता ताभ्यां नमस्तौ नो मृडयतां  
 ते यं द्विष्मो यश्च नो द्वेष्टि तं वां जम्भे  
 दधाम्यवस्थावा नामास्युदीची दित्तस्यास्ते वरुणोऽधि-  
 पतिस्तिरश्चराजी रक्षिता यश्चाधिपतिर्यश्च गोप्ता ताभ्यां  
 नमस्तौ नो मृडयतां ते यं द्विष्मो यश्च नो द्वेष्टि तं वां जम्भे  
 दधाम्यधिपत्नी नामासि बृहती दित्तस्यास्ते बृहस्पतिरधिपतिः  
 श्वित्रो रक्षिता यश्चाधिपतिर्यश्च गोप्ता ताभ्यां नमस्तौ नो  
 मृडयतां ते यं द्विष्मो यश्च नो द्वेष्टि तं वां जम्भे दधामि  
 वशिनी नामासीयं दित्तस्यास्ते यमोऽधिपतिः कल्माषग्रीवो  
 रक्षिता यश्चाधिपतिर्यश्च गोप्ता ताभ्यां नमस्तौ नो मृडयतां  
 ते यं द्विष्मो यश्च नो द्वेष्टि तं वां जम्भे दधामि॥

## ॥ गन्धर्वाहुतीः ॥

हेतयो नाम स्थ तेषां वः पुरो गृहा अग्निर्व इषवः सलिलो  
 वातनामं तेभ्यो वो नमस्ते नो मृडयत ते यं द्विष्मो यश्च नो  
 द्वेष्टि तं वो जम्भे दधामि  
 निलिम्पा नाम स्थ तेषां वो दक्षिणा गृहाः पितरो व इषवः  
 सगरो



वा॒तना॒मं ते॒भ्यो॑ वो॒ नम॒स्ते नो॑ मृ॒डय॑त॒ ते यं॑ द्वि॒ष्मो यश्च॑ नो॒  
द्वेष्टि॑ तं वो॒ जम्भे॑ द॒धामि॑

व॒ज्रिणो॑ ना॒मं स्थ॒ तेषां॑ वः प॒श्चाद्गृ॑हाः स्व॒प्नो व॒ इष॑वो ग॒ह्वरो॑  
वा॒तना॒मं ते॒भ्यो॑ वो॒ नम॒स्ते नो॑ मृ॒डय॑त॒ ते यं॑ द्वि॒ष्मो यश्च॑ नो॒  
द्वेष्टि॑ तं वो॒ जम्भे॑

द॒धाम्य॑व॒स्थावा॑नो॒ ना॒मं स्थ॒ तेषां॑ व उत्त॒राद्गृ॑हा आ॒पो व॒  
इष॑वः स॒मुद्रो॑

वा॒तना॒मं ते॒भ्यो॑ वो॒ नम॒स्ते नो॑ मृ॒डय॑त॒ ते यं॑ द्वि॒ष्मो यश्च॑ नो॒  
द्वेष्टि॑ तं वो॒ जम्भे॑

द॒धाम्य॑धि॒पत॑यो॒ ना॒मं स्थ॒ तेषां॑ व उ॒परि॑ गृ॒हा व॒र्षं व॒  
इष॑वोऽव॒स्वान्

वा॒तना॒मं ते॒भ्यो॑ वो॒ नम॒स्ते नो॑ मृ॒डय॑त॒ ते यं॑ द्वि॒ष्मो यश्च॑ नो॒  
द्वेष्टि॑ तं वो॒ जम्भे॑ द॒धामि॑

ऋ॒व्या ना॒मं स्थ॒ पार्थि॑वा॒स्तेषां॑ व इ॒ह गृ॑हा अ॒न्नं व॒ इष॑वो  
नि॒मिषो॑

वा॒तना॒मं ते॒भ्यो॑ वो॒ नम॒स्ते नो॑ मृ॒डय॑त॒ ते यं॑ द्वि॒ष्मो यश्च॑ नो॒  
द्वेष्टि॑ तं वो॒ जम्भे॑ द॒धामि॑।

## ॥ अज्यानि ॥

श॒तायु॑धाय श॒तवी॑र्याय श॒तोत॑येऽभि॒माति॑षाहे॑। श॒तं यो नः॑  
श॒रदो॑ अ॒जीता॑नि॒न्द्रो नेष॑दति॒ दुरि॑तानि॒ विश्वा॑॥

ये च॒त्वारः प॒थयो॑ दे॒व्याना॑ अन्त॒रा द्यावा॑पृथि॒वी वि॒यन्ति॑।  
तेषां॑ यो अज्या॑निम॒र्जीति॑मा॒ वह॑त्तस्मै॒ नो दे॒वाः परि॑ दत्ते॒ह  
सर्वे॑॥

ग्री॒ष्मो हे॑म॒न्त उ॒त नो॑ वस॒न्तः श॒रद्व॑र्षाः सु॒वितं॑ नो॒ अस्तु॑।  
तेषा॑मृ॒तूनां॑ श॒तशार्॑दानां॒ निवा॑त ए॒षाम॒भये॑ स्याम॥

इ॒दुव॒त्सरा॑यं परि॒वत्स॑रायं सं॒वत्स॑रायं कृ॒णुता॑ बृ॒हन्न॑मः। तेषा॑  
व॒यं॑ सु॒म॒तौ य॒ज्ञिया॑नां॒ ज्यो॒गजी॑ता॒ अह॑ताः स्याम॥

भ॒द्रान्नः॑ श्रे॒यः स॑म॒नैष्ट॑ दे॒वास्त्वया॑ऽव॒सेन॒ स॑म॒शीम॑हि त्वा। स  
नो॑ म॒योभूः॑ पि॒तो आ॒विंश॑स्व॒ शन्तो॑काय॒ त॒नुवै॑ स्यो॒ नः॥

भू॒तं भ॒व्यं भ॒विष्य॑द्वष॒ट् स्वाहा॑  
न॒म ऋ॒क्साम॑यजुर्वष॒ट् स्वाहा॑  
न॒मो गाय॑त्री॒त्रिष्टु॒ब्जग॑ती वष॒ट् स्वाहा॑  
न॒मः पृथि॑व्यन्त॒रिक्षं॑ द्यौर्वष॒ट् स्वाहा॑  
न॒मोऽग्नि॑र्वा॒युः सूर्यो॑ वष॒ट् स्वाहा॑  
न॒मः प्रा॒णो व्या॒नोऽपा॒नो वष॑ट् स्वाहा॒  
न॒मोऽन्नं॑ कृ॒षिर्वृष्टि॑र्वष॒ट् स्वाहा॑  
न॒मः पि॒ता पु॒त्रः पौ॒त्रो वष॑ट् स्वाहा॒  
न॒मो भूर्भुवः॑ सु॒र्वष॑ट् स्वाहा॒ नमः॑।

## ॥ अथर्वशिरसम् ॥

(तैत्तिरीयब्राह्मणे अष्टकम् - १/प्रश्नः - ५/अनुवाकः - ८)

इन्द्रो दधीचो अस्थभिः। वृत्राण्यप्रतिष्कृतः। जघान  
नवतीर्नवा। इच्छन्नश्वस्य यच्छिरः। पर्वतेष्वपश्रितम्।  
तद्विदच्छर्यणावति। अत्राह गोरमन्वत। नाम त्वष्टुरपीच्यम्।  
इत्था चन्द्रमंसो गृहे। इन्द्रमिद्राथिनो बृहत्॥

इन्द्रमर्केभिरर्किणः। इन्द्रं वाणीरनूपत। इन्द्र इद्धर्योः सचा।  
सम्मिश्र आवचो युजा। इन्द्रो वज्री हिरण्ययः। इन्द्रो दीर्घाय  
चक्षसे। आ सूर्य रोहयद्विवि। वि गोभिरद्रिमैरयत्। इन्द्र  
वाजेषु नो अवा। सहस्रप्रधनेषु च॥

उग्र उग्रभिरूतिभिः। तमिन्द्रं वाजयामसि। महे वृत्राय  
हन्तवे। स वृषा वृषभो भुवत्। इन्द्रः स दामने कृतः।  
ओजिष्ठः स बले हितः। द्युम्नी श्लोकी स सौम्यः। गिरा  
वज्रो न सम्भृतः। सबलो अनपच्युतः। ववक्षुरुग्रो अस्तृतः॥

## ॥ प्रत्यङ्गिरसम् ॥

(तैत्तिरीयब्राह्मणे अष्टकम् - २/प्रश्नः - ३/अनुवाकः - २)

चक्षुषो हेते मनंसो हेते। वाचो हेते ब्रह्मणो हेते। यो  
मां ऽघायुरभिदासंति। तमग्ने मेन्या मेनिं कृणु। यो मा चक्षुषा  
यो मनंसा। यो वाचा ब्रह्मणा ऽघायुरभिदासंति। तयां ऽग्ने त्वं  
मेन्या। अमुममेनिं कृणु। यत्किञ्चासौ मनंसा यच्च वाचा।

य॒ज्ञैर्जु॒होति॒ यजु॑षा ह॒विर्भिः॑॥

तन्मृत्यु॑र्निर्ऋ॒त्या संवि॑दानः। पुरादि॒ष्टादाहु॑तीरस्य हन्तु।  
या॒तु॒धाना॒ निर्ऋ॑तिरादुरक्षः। ते अ॒स्य घ्न॑न्त्व॒नृतेन॑ स॒त्यम्।  
इन्द्रे॑षिता॒ आज्य॑मस्य म॒घ्नन्तु। मा तत्स॑मृद्धि॒ यद॒सौ  
क॒रोति॑। ह॒न्मि ते॒ऽहं कृ॑तः॒ ह॒विः। यो मे॑ घो॒रम॑चीकृतः।  
अपा॑ञ्चौ त उ॒भौ बा॒हू। अप॑न॒ह्याम्या॒स्यम्॥

अप॑ न॒ह्यामि॑ ते बा॒हू। अप॑ न॒ह्याम्या॒स्यम्। अ॒ग्नेर्दे॒वस्य॑  
ब्रह्म॑णा। सर्वं ते॒ऽवधि॑षं कृ॒तम्। पुरा॑ऽमुष्यं वष॒ट्कारा॑त्। य॒ज्ञं  
दे॒वेषु॑ नस्कृ॒धि। स्वि॑ष्ट॒म॒स्माकं॑ भूयात्। माऽस्मान्प्रा॒प॒न्न॒रा॑तयः।  
अ॒न्ति दू॒रे स॒तो अ॒ग्ने। भ्रात॑व्यस्याभि॒दास॑तः॥१४॥

व॒ष॒ट्कारेण॑ वज्रेण। कृ॒त्याः॑ ह॒न्मि कृ॑ताम॒हम्। यो मा॒ नक्तं॑  
दिवा॑ सा॒यम्। प्रा॒तश्चाहो॑ नि॒पीय॑ति। अ॒द्या तमि॑न्द्र॒ वज्रेण॑।  
भा॒त॒व्यं पा॑दयाम॒सि।

(तैत्तिरीयब्राह्मणे अष्टकम् - २/प्रश्नः - ५/अनुवाकः - १)

प्रा॒णो र॑क्षति॒ विश्व॑मेज॑त्। इ॒र्यो भू॒त्वा ब॑हु॒धा ब॒हूनि॑। स  
इत्स॑र्वं व्या॒नशे॑। यो दे॒वो दे॒वेषु॑ वि॒भूर॑न्तः। आवृ॑द॒दात्  
क्षेत्रि॑य॒ध्व॒ग॒द्वषा॑। तमि॒त्प्रा॒णं म॒न॒सोप॑ शिक्ष॒त। अ॒ग्रं  
दे॒वाना॑मि॒दम॑त्तु नो ह॒विः। म॒न॑स॒श्चित्ते॒दम्। भू॒तं भ॒व्यं च  
गु॒प्यते॑। तद्धि दे॒वेष्व॑ग्रि॒यम्॥

आ न॑ ए॒तु पुर॑श्च॒रम्। स॒ह दे॒वैरि॒मः॑ ह॒वम्। म॒नः

श्रेयसि॑ श्रेयसि॑ । कर्मन् य॒ज्ञप॑तिं दधत् । जुषतां॑ मे वा॒ग्नि॑द॒  
ह॒विः । वि॒राड्दे॒वी पु॒रोहि॑ता । ह॒व्य॒वाडन॑पायिनी । यया॑ रूपाणि  
बहु॒धा वद॑न्ति । पेशा॑सि दे॒वाः पर॑मे ज॒नित्रे॑ । सा नो  
वि॒राडन॑पस्फुरन्ती ॥

वाग्दे॒वी जुष॑तामिद॒द॒ ह॒विः । चक्षु॑र्दे॒वानां॑ ज्योति॑र॒मृते॒ न्य॒क्तम् ।  
अ॒स्य वि॒ज्ञाना॑य बहु॒धा निधी॑यते । तस्य॑ सु॒म्नम॑शीमहि । मा  
नो हा॒सीद्विचक्ष॑णम् । आयु॑रि॒न्नः प्रती॑र्यताम् । अन॑न्धाश्चक्षु॑षा  
व॒यम् । जी॒वा ज्योति॑रशीमहि । सुव॒ज्योति॑रु॒तामृ॒तम् । श्रोत्रे॑ण  
भ॒द्रमु॒त शृ॑ण्वन्ति स॒त्यम् । श्रोत्रे॑ण॒ वाचं॑ बहु॒धोद्य॑मानाम् ।  
श्रोत्रे॑ण॒ मोद॑श्च॒ मह॑श्च श्रूयते । श्रोत्रे॑ण॒ सर्वा॑ दि॒श आ शृ॑णोमि ।  
येन॒ प्राच्या॑ उ॒त दक्षि॑णा । प्र॒तीच्ये॑ दि॒शः शृ॑ण्वन्त्यु॒त्तरा॑त् ।  
तदिच्छो॑त्रं बहु॒धोद्य॑मानम् । अ॒रान्न ने॒मिः परि॒ सर्वं॑ बभूव ॥

(तैत्तिरीयब्राह्मणे अष्टकम् - २/प्रश्नः - ७/अनुवाकः - ७)

सि॒हे व्या॒घ्र उ॒त या पृ॒दाकौ । त्विषि॑र॒ग्नौ ब्रा॑ह्म॒णे सू॒र्ये  
या । इन्द्रं॑ या दे॒वी सु॒भगा॑ ज॒जान॑ । सा न॒ आग॑न्वर्चसा  
संविदा॒ना । या रा॑ज॒न्ये दु॒न्दुभा॑वाय॒तायाम् । अश्व॑स्य॒ क्रन्द्ये॒  
पुरु॑षस्य मा॒यौ । इन्द्रं॑ या दे॒वी सु॒भगा॑ ज॒जान॑ । सा न॒  
आग॑न्वर्चसा संविदा॒ना । या ह॒स्तिनि॑ द्वी॒पिनि॑ या हि॒रण्ये ।  
त्विषि॑र॒श्वेषु॑ पुरु॒षेषु॑ गो॒षु ॥

इन्द्रं॑ या दे॒वी सु॒भगा॑ ज॒जान॑ । सा न॒ आग॑न्वर्चसा

संविदा॒ना। रथे॑ अ॒क्षेपुं॑ वृष॒भस्य॑ वाजे॑। वाते॑ प॒र्जन्ये॑  
वरु॑णस्य शु॒ष्मे। इन्द्रं॑ या दे॒वी सु॒भगा॑ ज॒जान॑। सा न॒  
आग॒न्वर्च॑सा संविदा॒ना। राड॑सि वि॒राड॑सि। स॒म्राड॑सि  
स्व॒राड॑सि। इन्द्रा॑य त्वा तेज॑स्वते तेज॑स्वन्तः॑ श्री॒णामि॑।  
इन्द्रा॑य त्वौज॑स्वत॒ ओज॑स्वन्तः॑ श्री॒णामि॑॥

इन्द्रा॑य त्वा प॒यस्व॑ते प॒यस्व॑न्तः॑ श्री॒णामि॑। इन्द्रा॑य  
त्वाऽऽयु॑ष्मत् आयु॑ष्मन्तः॑ श्री॒णामि॑। तेजो॑ऽसि। तत्ते॒ प्र  
य॑च्छामि। तेज॑स्वदस्तु मे॒ मुख॑म्। तेज॑स्वच्छि॒रो अस्तु॑  
मे। तेज॑स्वान् वि॒श्वतः॑ प्र॒त्यङ्। तेज॑सा॒ सं पि॑पृ॒ग्धि मा॑।  
ओजो॑ऽसि। तत्ते॒ प्र य॑च्छामि॥

ओज॑स्वदस्तु मे॒ मुख॑म्। ओज॑स्वच्छि॒रो अस्तु॑ मे।  
ओज॑स्वान् वि॒श्वतः॑ प्र॒त्यङ्। ओज॑सा॒ सं पि॑पृ॒ग्धि मा॑।  
पयो॑ऽसि। तत्ते॒ प्र य॑च्छामि। प॒यस्व॑दस्तु मे॒ मुख॑म्।  
प॒यस्व॑च्छि॒रो अस्तु॑ मे। प॒यस्वान् वि॒श्वतः॑ प्र॒त्यङ्। प॒यसा॑  
सं पि॑पृ॒ग्धि मा॑॥

आयु॑रसि। तत्ते॒ प्र य॑च्छामि। आयु॑ष्मदस्तु मे॒ मुख॑म्।  
आयु॑ष्मच्छि॒रो अस्तु॑ मे। आयु॑ष्मान् वि॒श्वतः॑ प्र॒त्यङ्।  
आयु॑षा॒ सं पि॑पृ॒ग्धि मा॑। इ॒मम॑ग्र॒ आयु॑षे॒ वर्च॑से कृ॒धि।  
प्रि॒यः॑ रेतो॑ वरुण सोम राजन्। मा॒तेवा॑स्मा अदि॒ते श॑र्म  
यच्छ॑। वि॒श्वे दे॒वा ज॑रद॒ष्टिर्य॑थाऽस॑त्॥

आयु॑रसि वि॒श्वायु॑रसि। सर्वा॑यु॒रसि॒ सर्व॑मायु॑रसि। यतो॒ वातो॑  
मनो॑जवाः। यतः॒ क्षर॑न्ति॒ सिन्ध॑वः। तासां॑ त्वा॒ सर्वा॑सा॒  
रु॒चा। अ॒भिषि॑ञ्चामि॒ वर्च॑सा। स॒मु॒द्र इ॑वासि गृ॒ह्मना॑। सोमं  
इवा॒स्यदा॑भ्यः। अ॒ग्निरि॑व वि॒श्वतः॑ प्र॒त्यङ्ङुः। सूर्य॑ इव॒ ज्योति॑षा  
वि॒भूः॥

अ॒पां यो द्रव॑णे॒ रसः॑। तम॒हम॒स्मा आ॑मुष्याय॒णाय॑। तेज॑से  
ब्रह्म॑वर्च॒साय॑ गृह्णामि। अ॒पां य ऊ॒र्मौ रसः॑। तम॒हम॒स्मा  
आ॑मुष्याय॒णाय॑। ओज॑से वी॒र्या॑य गृह्णामि। अ॒पां यो म॑ध्यतो  
रसः॑। तम॒हम॒स्मा आ॑मुष्याय॒णाय॑। [पु॒ष्ट्यै प्र॑जन॒नाय॑ गृह्णामि।  
अ॒पां यो य॒ज्ञियो॑ रसः॑। तम॒हम॒स्मा आ॑मुष्याय॒णाय॑।] आयु॑षे  
दीर्घा॑यु॒त्वाय॑ गृह्णामि॥

(तैत्तिरीयब्राह्मणे अष्टकम् - २/प्रश्नः - ८/अनुवाकः - ८)

अ॒हम॑स्मि प्रथम॒जा ऋ॒तस्य॑। पूर्वं॑ दे॒वेभ्यो॑ अ॒मृत॑स्य॒ नाभिः॑।  
यो मा॒ ददा॑ति॒ स इ॒देव॑ माऽऽवा॑ः। अ॒हम॑न्न॒मन्न॑म॒दन्त॑म॒ग्निः।  
पूर्व॑म॒ग्नेरपि॑ दह॒त्यन्न॑म्। यत्तौ॑ हा॒साते॑ अ॒हमु॑त्त॒रेषु॑।  
व्या॒त्तम॑स्य प॒शवः॑ सुज॒म्भम्॑। पश्य॑न्ति॒ धीराः॑ प्रच॑रन्ति॒  
पाकाः॑। जहा॑म्यन्यन्न ज॒हाम्य॑न्यम्। अ॒हम॑न्नं व॒शमि॑च्छ॒रामि॑॥

स॒मा॒नम॑र्थं पर्ये॒मि भु॑ञ्जत्। को माम॑न्नं मनु॒ष्यो द॑येत। परा॑के  
अ॒न्नं नि॒हितं॑ लो॒क ए॒तत्। वि॒श्वैर्दे॒वैः पि॒तृभिर्गु॑प्तम॒न्नम्।  
यद॒द्यते॑ लु॒प्यते॑ यत्प॑रो॒प्यते॑। श॒त॒त॒मी सा॑ त॒नूर्मे॑ बभूव।

म॒हान्तौ॑ च॒रू स॑कृद्गु॒धेन॑ पप्रौ। दि॒वं च॒ पृ॒श्निं पृ॒थि॒वीं च॑  
सा॒कम्। तत्स॒म्पिब॑न्तो॒ न मि॑नन्ति वे॒धसः॑। नैतद्भूयो॒ भव॑ति  
नो कनी॑यः॥

अन्नं॑ प्रा॒णमन्न॑मपा॒नमा॑हुः। अन्नं॑ मृ॒त्युं तमु॑ जी॒वातु॑माहुः।  
अन्नं॑ ब्र॒ह्माणो॑ ज॒रसं॑ वदन्ति। अन्न॑माहुः प्र॒जन॑नं प्र॒जाना॑म्।  
मोघ॑मन्नं विन्दते॒ अप्र॑चेताः। स॒त्यं ब्र॑वीमि व॒ध इ॒त्स तस्य॑।  
नार्य॑मणं पु॒ष्यति॑ नो सखा॑यम्। के॒वला॑घो भवति के॒वला॒दी।  
अ॒हं मे॒घः स्त॒नय॑न्वर्ष॑न्नस्मि। मा॒मद॑न्त्य॒हम॑द्भ्य॒न्यान्॥  
अ॒हं स॒दमृ॑तो॑ भवामि। मदा॑दित्या अधि॒ सर्वे॑ तपन्ति।

## ॥ वाक्सूक्तम् ॥

(तैत्तिरीयब्राह्मणे अष्टकम् - २/प्रश्नः - ४/अनुवाकः - ५९-६०)

दे॒वीं वाच॑म॒जन॑यन्त दे॒वाः। तां वि॒श्वरू॑पाः प॒शवो॑ वदन्ति।  
सा नो॑ म॒न्ध्रेष॑मूर्जं दुहा॑ना। धे॒नुर्वा॑ग॒स्मानु॑प॒ सुष्टु॑तैतु॥६०॥  
यद्वा॑ग्वद॑न्त्यविचे॒त॒नानि॑। रा॒ष्ट्री दे॒वानां॑ निष॒साद॑ म॒न्द्रा। चत॑स्र॒  
ऊर्जं॑ दुदुहे॒ पया॑ंसि। क्व॑ स्विद॒स्याः पर॑मं ज॒ंगाम॑।



अ॒न॒न्ताम॑न्ता॒दधि॑ निर्मि॑तां म॒हीम्। यस्यां॑ दे॒वा  
अ॒दधु॑र्भोज॑नानि। एका॑क्षरां द्वि॒पदा॑ ष॒ददां॑ च। वाचं॑  
दे॒वा उप॑ जीवन्ति॒ विश्वे॑। वाचं॑ दे॒वा उप॑ जीवन्ति॒



विश्वे॑। वाचं॑ गन्ध॒र्वाः प॒शवो॑ मनु॒ष्याः॑। वा॒ची॒मा वि॒श्वा  
भुव॑नान्यर्पिता॥

सा नो॑ हव॑ जुषतामिन्द्र॑पत्नी। वा॒ग॒क्षरं॑ प्रथम॒जा ऋ॒तस्य॑।  
वेदा॑नां मा॒ताऽमृत॑स्य नाभिः॑। सा नो॑ जुषा॒णोप॑ य॒ज्ञमागा॑त्।  
अव॑न्ती दे॒वी सु॒हवा॑ मे अस्तु। या॒मृष॑यो म॒न्त्रकृ॑तो  
मनी॒षिणः॑। अ॒न्वैच्छं॑ दे॒वास्तप॑सा श्रमे॑ण। तान्दे॒वीं वाच॑ः  
ह॒विषा॑ यजामहे। सा नो॑ दधातु सु॒कृत॑स्य लो॒के। च॒त्वारि॑  
वाक्प॑रिमिता प॒दानि॑॥

तानि॑ विदुर्ब्राह्म॒णा ये म॑नी॒षिणः॑। गुहा॒ त्रीणि॑ निहि॑ता  
नेङ्ग॑यन्ति। तुरी॒यं वा॒चो म॑नु॒ष्या वद॑न्ति।

### ॥श्रद्धा सूक्तम्॥

श्र॒द्धया॒ऽग्निः समि॑ध्यते। श्र॒द्धया॑ विन्दते ह॒विः। श्र॒द्धां भ॑गस्य  
मूर्ध॑नि। वच॒सा वे॑दयामसि। प्रि॒यं श्र॑द्धे दद॑तः। प्रि॒यं श्र॑द्धे  
दिदा॑सतः। प्रि॒यं भो॒जेषु॑ यज्व॑सु॥

इदं म॑ उदि॑तं कृ॒धि। यथा॑ दे॒वा असु॑रेषु। श्र॒द्धामु॑ग्रेषु च॒क्रिरे॑।  
ए॒वं भो॒जेषु॑ यज्व॑सु। अ॒स्माक॑मुदि॑तं कृ॒धि। श्र॒द्धां दे॒वा  
यज॑मानाः। वा॒युगो॑पा उपा॑सते। श्र॒द्धां ह॒ृदय्य॑याऽऽकू॑त्या।  
श्र॒द्धया॑ हूयते ह॒विः। श्र॒द्धां प्रा॒तर॑ह्वामहे॥

श्र॒द्धां म॒ध्यन्दि॑नं परि॑। श्र॒द्धां सूर्य॑स्य नि॒मृचि॑। श्र॒द्धे

श्रद्धा॑पये॒ह मा॑। श्रद्धा॑ दे॒वानधि॑ वस्ते। श्रद्धा॑ वि॒श्वमि॒दं  
जग॑त्। श्रद्धा॑ का॒मस्य॑ मा॒तरम्। ह॒विषा॑ वर्धयामसि।

### ॥ ब्रह्मा सूक्तम् ॥

ब्रह्म॑ जज्ञा॒नं प्रथ॑मं पु॒रस्ता॑त्। वि सी॒म॒तः सु॒रुचो॑ वे॒न आ॑वः।  
स बु॒ध्निया॑ उप॒ मा अ॑स्य वि॒ष्ठाः॥६६॥

स॒तश्च॑ यो॒निम॑स॒तश्च॑ वि॒वः। पि॒ता वि॒राजा॑मृष॒भो र॑यी॒णाम्।  
अ॒न्तरि॑क्षं वि॒श्वरू॑प॒ आवि॑वेश। तम॒कैर॒भ्यर्च॑न्ति व॒त्सम्। ब्रह्म॑  
सन्तं॑ ब्रह्म॑णा वर्धयन्तः। ब्रह्म॑ दे॒वानं॑जनयत्। ब्रह्म॑ वि॒श्वमि॒दं  
जग॑त्। ब्रह्म॑णः॒ क्षत्रं॑ निर्मि॒तम्। ब्रह्म॑ ब्राह्म॒ण आ॒त्मना॑।  
अ॒न्तर॑स्मिन्नि॒मे लो॒काः॥६७॥

अ॒न्तर्वि॑श्वमि॒दं जग॑त्। ब्रह्मै॒व भू॒तानां॑ ज्येष्ठ॑म्। तेन॒ कौऽर॒हति॑  
स्पर्धि॑तुम्। ब्रह्म॑न्दे॒वास्त्रय॑स्त्रि॒ंशत्। ब्रह्म॑न्निन्द्रप्रजापती। ब्रह्म॑न्  
ह॒ विश्वा॑ भू॒तानि॑। ना॒वीवा॒न्तः समा॑हि॒ता। च॒तस्र॑ आशाः  
प्रच॑रन्त्व॒ग्रयः॑। इ॒मं नो॑ य॒ज्ञं न॑यतु प्रजा॒नन्। घृ॒तं पि॒न्वन्न॑जर॒ं  
सु॒वीर॑म्॥

ब्रह्म॑ स॒मिद्ध॑व॒त्याहु॑तीनाम्।

### ॥ गो-सूक्तम् ॥

आ गा॒वो अ॒गम॑न्नु॒त भ॒द्रम॑क्रन्। सीद॑न्तु गो॒ष्ठे र॒णय॑न्त्व॒स्मे।  
प्र॒जाव॑तीः पु॒रुरू॒पा इ॒ह स्युः॑। इन्द्रा॑य पूर्वीरुषसो दुहा॑नाः।  
इन्द्रो॑ यज्व॑ने पृण॒ते च॑ शि॒क्षति॑। उपे॒द॒दाति॑ न स्वं मु॒षाय॑ति।

भूयोभूयो रयिमिदस्य वर्धयन्। अभिन्ने खिले नि दधाति  
देवयुम्।

न ता नशन्ति न दंभाति तस्करः। नैनां अमित्रो  
व्यथिरादधरषति। देवाश्च याभिर्यजते ददाति च।  
ज्योगित्ताभिः सचते गोपतिः सह। न ता अर्वा रेणुककाटो  
अश्नुते। न सङ्स्कृतत्रमुप यन्ति ता अभि। उरुगायमभयं  
तस्य ता अनु। गावो मर्त्यस्य वि चरन्ति यज्वनः॥

गावो भगो गाव इन्द्रो मे अच्छात्। गावः सोमस्य प्रथमस्य  
भक्षः। इमा या गावः सजनास इन्द्रः। इच्छामीद्धदा मनसा  
चिदिन्द्रम्। यूयं गावो मेदयथा कृशञ्चित्। अश्लीलञ्चित्कृणुथा  
सुप्रतीकम्। भद्रं गृहं कृणुथ भद्रवाचः। बृहद्वो वयं उच्यते  
सभासु। प्रजावतीः स्यूवसः रिशन्तीः। शुद्धा अपः सुप्रपाणे  
पिबन्तीः। मा वः स्तेन ईशत् माऽघशंसः। परि वो हेती  
रुद्रस्य वृञ्चात्। उपेदमुपपर्वनम्। आसु गोषूपपृच्यताम्।  
उपर्षभस्य रेतसि। उपेन्द्र तवं वीर्यम्॥

ता सूर्याचन्द्रमसां विश्वभृत्तमा महत्। तेजो वसुमद्राजतो  
दिवि। सामात्माना चरतः सामचारिणा। ययोर्व्रतं न ममे जातु  
देवयोः। उभावन्तौ परि यात अमर्या। दिवो न रश्मीः स्तनुतो  
व्यर्णवे। उभा भुवन्ती भुवना कविक्रतू। सूर्या न चन्द्रा  
चरतो हतामती। पती द्युमद्विश्वविदा उभा दिवः। सूर्या उभा

चन्द्रमसा विचक्षणा॥

विश्ववारा वरिवोभा वरेण्या। ता नोऽवतं मतिमन्ता महिब्रता।  
विश्ववपरी प्रतरणा तरन्ता। सुवर्विदा दृशये भूरिरश्मी।  
सूर्या हि चन्द्रा वसु त्वेषदर्शता। मनस्विनोभानुचरतोनु  
सन्दिवम्। अस्य श्रवो नद्यः सप्त बिभ्रति। द्यावा क्षामा पृथिवी  
दर्शतं वपुः। अस्मे सूर्याचन्द्रमसाऽभिचक्षे। श्रद्धेकमिन्द्र  
चरतो विचर्तुरम्॥

पूर्वापरं चरतो माययैतौ। शिशू क्रीडन्तौ परि यातो अध्वरम्।  
विश्वान्यन्यो भुवनाऽभि चष्टे। ऋतूनन्यो विदधञ्जायते पुनः।  
हिरण्यवर्णाः शुचयः पावका यासु जातः कश्यपो यास्विन्द्रः।  
अग्निं या गर्भं दधिरे विरूपास्ता न आपः शङ् स्योना  
भवन्तु॥ यासां राजा वरुणो याति मध्ये सत्यानृते अवपश्यं  
जनानाम्। मधुश्चुतः शुचयो याः पावकास्ता न आपः शङ्  
स्योना भवन्तु॥ यासां देवा दिवि कृण्वन्ति भक्षं या अन्तरिक्षे  
बहुधा भवन्ति। याः पृथिवीं पयसोन्दन्ति शुक्रास्ता न आपः  
शङ् स्योना भवन्तु॥ शिवेन मा चक्षुषा पश्यताऽऽपः शिवया  
तनुवोप स्पृशत त्वचं मे। सर्वा अग्नी रप्सुषदो हुवे वो  
मयि वर्चो बलमोजो नि धत्त॥

आपो भद्रा घृतमिदाप आसुरग्नीषोमौ बिभ्रत्याप इत्ताः। तीव्रो  
रसो मधुपृचांमरङ्गम आ मा प्राणेन सह वर्च सागन्॥

आदित्पंश्याम्युत वां शृणोम्यामा घोषो गच्छति वाङ् न  
आसाम्। मन्येभेजानो अमृतस्य तर्हि हिरण्यवर्णा अतृपं  
यदावः॥

नासदासीन्नो सदासीत्तदानीम्। नासीद्रजो नो व्योमा परो  
यत्। किमावरीवः कुह कस्य शर्मन्॥

अम्भः किमासीद्गहनं गभीरम्। न मृत्युरमृतं तर्हि ना  
रात्रिया अहं आसीत्प्रकेतः। आनीदवातः स्वधया तदेकम्।  
तस्माद्धान्यं न परः किञ्चनास। तम आसीत्तमसा गूढमग्रे  
प्रकेतम्। सुलिलः सर्वमा इदम्। तुच्छेनाव्वपिहितं  
यदासीत्। तमसस्तन्महिना जायतैकम्। कामस्तदग्रे  
समवर्तताधि॥

मनसो रेतः प्रथमं यदासीत्। सतो बन्धुमसति निरविन्दन्।  
हृदि प्रतीष्या कवयो मनीषा। तिरश्चीनो विततो  
रश्मिरेषाम्। अधः स्विदासी(३)दुपरि स्विदासी(३)त्।  
रेतोधा आसन्महिमान आसन्। स्वधा अवस्तात्प्रयतिः  
परस्तात्। को अद्धा वेद क इह प्र वोचत्। कुत आजाता  
कुत इयं विसृष्टिः। अर्वाग्देवा अस्य विसर्जनाय॥

अथा को वेद यत आबभूव। इयं विसृष्टिर्यत आबभूव। यदि  
वा दधे यदि वा न। यो अस्याध्यक्षः परमे व्योमन्। सो अङ्ग  
वेद यदि वा न वेद। किंस्विद्वनङ्ग उ स वृक्ष आसीत्।

यतो॒ द्यावा॑पृथि॒वी नि॑ष्टत॒क्षुः। मनी॑षिणो॒ मन॑सा पृच्छतेदु॒तत्।  
 यद॒ध्यति॑ष्ठद्भु॒वनानि॑ धा॒रयन्। ब्रह्म॒ वनं॑ ब्रह्म॒ स वृक्ष॑ आसीत्॥  
 यतो॒ द्यावा॑पृथि॒वी नि॑ष्टत॒क्षुः। मनी॑षिणो॒ मन॑सा वि॒ब्रवी॑मि वः।  
 ब्रह्मा॒ध्यति॑ष्ठद्भु॒वनानि॑ धा॒रयन्। प्रा॒तर॒ग्निं प्रा॒तरि॒न्द्रं ह॒वामहे॑।  
 प्रा॒तर्मि॒त्रावरु॑णा प्रा॒तर॒श्विना॑। प्रा॒तर्भगं॑ पू॒षणं॑ ब्रह्म॑णस्पतिम्।  
 प्रा॒तः सोम॑मु॒त रु॒द्रं हु॑वेम। प्रा॒तर्जितं॑ भग॑मु॒ग्रं हु॑वेम। व॒यं  
 पु॒त्रमदि॑ते॒र्यो वि॑ध॒र्ता। आ॒ध्रश्चि॒द्यं मन्य॑मानस्तुरश्चि॒त्॥

राजा॑ चि॒द्यं भगं॑ भ॒क्षीत्याह॑। भग॑ प्रणे॒तर्भग॑ सत्य॑राधः। भगे॒मां  
 धिय॑मुद॒व दद॑न्नः। भग॑ प्र णो॑ जनय॒ गोभि॑रश्वैः। भग॑ प्र  
 नृभि॑र्नृ॒वन्तः स्याम॑। उ॒तेदानीं॑ भग॑वन्तः स्याम॑। उ॒त प्र॑पि॒त्व  
 उ॒त मध्ये॑ अह्ना॑म्। उ॒तोदि॑ता मघ॒वन्त्सूर्य॑स्य। व॒यं दे॒वानां॑  
 सुम॒तौ स्या॑म। भग॑ ए॒व भग॑वा॑ अस्तु दे॒वाः॥

तेन॑ व॒यं भग॑वन्तः स्याम॑। तं त्वा॑ भग॒ सर्व॑ इ॒ज्जोह॑वीमि। स  
 नो॑ भग॒ पुर॑ ए॒ता भ॑वे॒ह। सम॑ध्व॒रायो॒षसो॑ नमन्त॑। द॒धि॒क्रावै॑व  
 शुच॑ये प॒दाय॑। अ॒र्वा॒ची॒नं व॑सु॒विदं॑ भग॑ नः। रथ॑मि॒वाश्वा॑  
 वा॒जिन॑ आ॒वह॑न्तु। अ॒श्वा॒वती॒र्गोम॑तीर्न उ॒षासः॑। वी॒र॒वतीः॑  
 सद॑मुच्छ॒न्तु भ॒द्राः। घृ॒तं दुहा॑ना वि॒श्वतः॑ प्रपी॑नाः। यू॒यं पा॑त  
 स्व॒स्तिभिः॑ सदा॑ नः॥

## ॥ नक्षत्रसूक्तम् ॥

(तैत्तिरीय संहितायां काण्डम् - ३/प्रपाठकः - ५/अनुवाकः - १)

अ॒ग्निर्नः॑ पा॒तु कृ॒त्तिकाः॑। नक्ष॑त्रं दे॒वमिन्द्रि॑यम्। इ॒दमा॑सां  
विचक्ष॑णम्। ह॒विरा॒सं जु॑होतन। यस्य॒ भान्ति॑ र॒श्मयो॒ यस्य॑  
के॒तवः॑। यस्ये॒मा वि॒श्वा भु॑व॒नानि॒ सर्वा॑। स कृ॒त्तिका॑भि॒-  
र॒भिसं॑वसानः। अ॒ग्निर्नो॑ दे॒वः सु॑वि॒ते द॑धातु॥१॥

प्र॒जाप॑ते रोहि॒णी वे॑तु॒ पत्नी॑। वि॒श्वरू॑पा बृ॒हती चि॒त्रभा॑नुः।  
सा नो॑ य॒ज्ञस्य॑ सु॒वि॒ते द॑धातु। यथा॒ जीवे॑म श॒रदः॑ स॒वीराः॑।  
रोहि॒णी दे॒व्युद॑गात्पु॒रस्ता॑त्। वि॒श्वा रू॒पाणि॑ प्रति॒मोद॑माना।  
प्र॒जाप॑ति॒ः ह॒विषा॑ व॒र्धय॑न्ती। प्रि॒या दे॒वाना॑मुप॑यातु  
य॒ज्ञम्॥२॥

सोमो॑ रा॒जा मृ॑गशी॒रुषे॑ण॒ आग॑न्। शि॒वं नक्ष॑त्रं प्रि॒यम॑स्य॒  
धा॒म। आ॒प्याय॑मानो बहु॒धा जने॑षु। रे॒तः प्र॒जां य॑ज॒माने॑  
दधातु। यत्ते॒ नक्ष॑त्रं मृ॑गशी॒रुषम॑स्ति। प्रि॒यः रा॑जन् प्रि॒यत॑मं  
प्रि॒याणा॑म्। तस्मै॑ ते सोम ह॒विषा॑ वि॒धेम। शं न॑ ए॒धि द्वि॑पदे॒  
शं च॑तु॒ष्पदे॑॥३॥

आ॒र्द्रया॑ रु॒द्रः प्रथ॑मा न ए॒ति। श्रेष्ठो॑ दे॒वानां॑ पति॑र॒घ्निया॑ना॒म्।  
नक्ष॑त्रमस्य ह॒विषा॑ वि॒धेम। मा नः॑ प्र॒जाः री॑रिष॒न्मोत॑  
वी॒रान्। हे॒ती रु॒द्रस्य॑ परि॑णो वृ॒णक्तु॑। आ॒र्द्रा नक्ष॑त्रं  
जुष॑ताः ह॒विर्नः॑। प्र॒मुञ्च॑मानौ दुरि॒तानि॒ वि॒श्वा। अ॒पाघ॑शः  
सन्नु॑दता॒मरा॑तिम्॥४॥

पुन॑र्नो दे॒व्यदि॑तिः स्पृ॒णोतु। पुन॑र्वसू नः पुन॑रेतां य॒ज्ञम्। पुन॑र्नो  
दे॒वा अ॒भिय॑न्तु सर्वे॑। पुनः पुन॑र्वो ह॒विषा॑ यजामः। ए॒वा  
न दे॒व्यदि॑तिरन॒र्वा। विश्व॑स्य भ॒र्त्री जग॑तः प्रति॒ष्ठा। पुन॑र्वसू  
ह॒विषा॑ वर्धय॑न्ती। प्रि॒यं दे॒वाना॑मप्येतु पाथः॥५॥

बृह॑स्पतिः प्रथ॒मं जाय॑मानः। ति॒ष्यं नक्ष॑त्रम॒भि सम्ब॑भूव। श्रेष्ठो  
दे॒वानां पृ॑त॒नासु जि॑ष्णुः। दि॒शोऽनु॑ सर्वा॒ अभ॑यं नो अस्तु।  
ति॒ष्यः पु॒रस्ता॑दु॒त म॑ध्य॒तो नः। बृह॑स्पतिर्नः परि॑पातु प॒श्चात्।  
बाधे॑तां द्वेषो॒ अभ॑यं कृ॒णुता॑म्। सु॒वीर्य॑स्य प॒तयः॑ स्याम॥६॥

इ॒दं स॒र्पेभ्यो॑ ह॒विर॑स्तु जुष्ट॑म्। आ॒श्रेषा॑ येषा॑मनु॒यन्ति॑  
चेतः॑। ये अ॒न्तरि॑क्षं पृथि॒वीं क्षि॑यन्ति। ते नः स॒र्पासो॑  
हव॒माग॑मिष्ठाः। ये रो॑च॒ने सूर्य॑स्यापि स॒र्पाः। ये दि॒वं  
दे॒वीमनु॑स॒ञ्चर॑न्ति। येषा॑माश्रेषा अ॒नुय॑न्ति का॒मम्। तेभ्यः  
स॒र्पेभ्यो॑ मधु॑मञ्जुहोमि॥७॥

उप॑हूताः पि॒तरो॒ ये म॒घासु॑। मनो॑जवसः सु॒कृतः॑ सु॒कृत्याः॑।  
ते नो नक्ष॑त्रे हव॒माग॑मिष्ठाः। स्व॒धाभि॑र्य॒ज्ञं प्र॑य॒तं जु॑षन्ताम्।  
ये अ॒ग्निद॑ग्धा येऽन॑ग्निदग्धाः। येऽमुं लो॒कं पि॒तरः॑ क्षि॒यन्ति॑।  
या॑श्च वि॒द्वया॑ उ॒ च न प्र॑वि॒द्वा। म॒घासु॑ य॒ज्ञं सु॒कृतं॑  
जु॑षन्ताम्॥८॥

गवां पतिः फल्गु॑नीनामसि त्वम्। तद॑र्यमन् वरुणमित्र  
चारु॑। तं त्वा व॒यं स॑नि॒तारं॑ सनी॒नाम्। जी॒वा जी॑वन्तमु॒प



संविशेम। येनेमा विश्वा भुवनानि सञ्जिता। यस्य देवा  
अनुस्यन्ति चेतः। अर्यमा राजाऽजरस्तु विष्मान्।  
फल्गुनीनामृषभो रौरवीति॥९॥

श्रेष्ठो देवानां भगवो भगासि। तत्त्वां विदुः फल्गुनीस्तस्य  
वित्तात्। अस्मभ्यं क्षत्रमजरं सुवीर्यम्। गोमदश्ववदुपसन्नु-  
देह। भगो ह दाता भग इत्प्रदाता। भगो देवीः  
फल्गुनीराविवेश। भगस्येत्तं प्रसवं गमेम। यत्र देवैः सधमादं  
मदेम॥१०॥

आयातु देवः संवितोपयातु। हिरण्ययेन सुवृता रथेन। वहन्  
हस्तं सुभगं विद्वानापसम्। प्रयच्छन्तं पपुंरिं पुण्यमच्छं।  
हस्तः प्रयच्छ त्वमृतं वसीयः। दक्षिणेन प्रतिगृणीम एनत्।  
दातारमद्य संविता विदेय। यो नो हस्ताय प्रसुवाति  
यज्ञम्॥११॥

त्वष्टा नक्षत्रमभ्येति चित्राम्। सुभगं संसं युवतिं  
रोचमानाम्। निवेशयन्नमृतान्मर्त्यांश्च। रूपाणि पिंशन्  
भुवनानि विश्वा। तन्नस्त्वष्टा तदु चित्रा विचष्टाम्। तन्नक्षत्रं  
भूरिदा अस्तु मह्यम्। तन्नः प्रजां वीरवतीं सनोतु। गोभिर्नो  
अश्वैः समनक्तु यज्ञम्॥१२॥

वायुर्नक्षत्रमभ्येति निष्प्राम्। तिग्मशृङ्गो वृषभो रोरुवाणः।  
समीरयन् भुवना मातरिश्वा। अप द्वेषांसि नुदतामरांतीः।

तन्नो वा॒युस्तदु॒ निष्ठां॑ शृ॒णोतु॑। तन्नक्ष॑त्रं भूरि॒दा अ॑स्तु॒ मह्यम्॑।  
तन्नो दे॒वासो॒ अनु॑जानन्तु॒ कामम्॑। यथा॒ तरे॑म॒ दुरि॑तानि॒  
विश्वो॑॥१३॥

दूर॒म॒स्मच्छ॑त्र॒वो य॑न्तु भी॒ताः। तदिन्द्रा॑ग्री कृ॒णुतां॑ तद्विशा॑खे।  
तन्नो दे॒वा अनु॑मदन्तु॒ यज्ञ॑म्। प॒श्चात् पुर॑स्ता॒दभयं॑ नो अस्तु।  
नक्ष॑त्राणा॒मधि॑पती॒ विशा॑खे। श्रेष्ठा॑विन्द्रा॒ग्री भुव॑नस्य गो॒पौ।  
विषू॑चः शत्रू॑नप॒बाध॑मानौ। अप॒ क्षुधं॑ नुदता॒मरा॑तिम्॥१४॥

पूर्णा॑ प॒श्चादु॑त पूर्णा॑ पुरस्ता॑त्। उन्म॑ध्यतः पौ॒र्णमा॒सी जि॑गाय।  
तस्या॑ दे॒वा अधि॑संवसन्तः। उ॒त्तमे॑ नाकं इ॒ह मा॑दयन्ताम्।  
पृ॒थ्वी सु॒वर्चा॑ युव॒तिः स॒जोषाः॑। पौ॒र्णमा॒स्युद॑गाच्छोभ॑माना।  
आ॒प्याय॑यन्ती॒ दुरि॑तानि॒ विश्वो॑। उ॒रुं दु॒हां यज॑मानाय॒  
यज्ञ॑म्॥१५॥

ऋ॒द्ध्यास्मि॑ ह॒व्यैर्नम॑सोप॒सद्य॑। मि॒त्रं दे॒वं मि॒त्रधे॑यं नो अस्तु।  
अ॒नूरा॒धान् ह॒विषा॑ व॒र्धय॑न्तः। श॒तं जी॑वेम॒ शर॑दः॒ सर्वा॑राः।  
चि॒त्रं नक्ष॑त्रमुद॑गात्पुरस्ता॑त्। अ॒नूरा॒धा स॒ इति॑ यद्वद॑न्ति।  
तन्मि॒त्र ए॑ति प॒थिभि॑र्दे॒व्याना॑ः। हि॒र॒ण्यये॑र्वित॑तैर॒न्तरि॑क्षे॥१६॥

इन्द्रो॑ ज्ये॒ष्ठाम॑नु॒ नक्ष॑त्रमेति। यस्मिन् वृ॒त्रं वृ॒त्र तू॒र्यं त॒तारं॑।  
तस्मिन्व॒यम॑मृ॒तं दु॒हानाः॑। क्षुधं॑ तरेम॒ दुरि॑तिं॒ दुरि॑ष्टिम्।  
पुर॒न्दरा॑य वृष॒भाय॑ धृ॒ष्णवे॑। अषा॑ढाय॒ सह॑मानाय मी॒ढुषे॑।  
इन्द्रा॑य ज्ये॒ष्ठा म॑धुम॒द्दुहा॑ना। उ॒रुं कृ॑णोतु॒ यज॑मानाय

लोकम्॥१७॥

मूलं प्रजां वीरवतीं विदेय। पराच्येतु निर्ऋतिः पराचा।  
गोभिर्नक्षत्रं पशुभिः समंक्तम्। अहर्भूयाद्यजमानाय मह्यम्।  
अहर्नो अद्य सुविते दधातु। मूलं नक्षत्रमिति यद्वदन्ति। पराचीं  
वाचा निर्ऋतिं नुदामि। शिवं प्रजायै शिवमस्तु मह्यम्॥१८॥

या दिव्या आपः पयसा सम्बभूवुः। या अन्तरिक्ष उत  
पार्थिवीर्याः। यासामषाढा अनुयन्ति कामम्। ता न आपः  
शः स्योना भवन्तु। याश्च कूप्या याश्च नाद्याः समुद्रियाः।  
याश्च वैशन्तीरुत प्रासचीर्याः। यासामषाढा मधु भक्षयन्ति।  
ता न आपः शः स्योना भवन्तु॥१९॥

तन्नो विश्वे उप शृण्वन्तु देवाः। तदषाढा अभिसंयन्तु यज्ञम्।  
तन्नक्षत्रं प्रथतां पशुभ्यः। कृषिर्वृष्टिर्यजमानाय कल्पताम्।  
शुभ्राः कन्या युवतयः सुपेशसः। कर्मकृतः सुकृतो वीर्यावतीः।  
विश्वान् देवान् हविषा वर्धयन्तीः। अषाढाः काममुपयान्तु  
यज्ञम्॥२०॥

यस्मिन् ब्रह्माभ्यजयत्सर्वमेतत्। अमुं च लोकमिदमूच सर्वम्।  
तन्नो नक्षत्रमभिजिद्विजित्य। श्रियं दधात्वहणीयमानम्।  
उभौ लोकौ ब्रह्मणा सञ्जितेमौ। तन्नो नक्षत्रमभिजिद्विचष्टाम्।  
तस्मिन्वयं पृतनाः सञ्जयेम। तन्नो देवासो अनुजानन्तु  
कामम्॥२१॥

शृ॒ण्वन्ति॑ श्रो॒णाम॒मृत॑स्य गो॒पाम्। पु॒ण्या॑मस्या॒ उप॑शृ॒णोमि॒  
वाच॑म्। म॒हीं दे॒वीं वि॒ष्णु॑पत्नीमजू॒र्याम्। प्र॒तीचीं॑ मेना॒  
ह॒विषा॑ यजामः। त्रे॒धा वि॒ष्णु॑रुरुगा॒यो वि॒च॑क्रमे। म॒हीं दि॒वं  
पृ॒थि॒वीम॒न्तरि॑क्षम्। तच्छ्रो॒णैति॑श्र॒वं इ॒च्छ॒मा॒ना। पु॒ण्य॒ः श्लो॒कं  
यज॑मानाय कृ॒ण्वती॑॥२२॥

अ॒ष्टौ दे॒वा वस॑वः सो॒म्यासः॑। चत॑स्रो दे॒वीर॒जराः॑ श्रवि॑ष्ठाः। ते  
य॒ज्ञं पा॑न्तु रज॑सः प॒रस्ता॑त्। सं॒वत्स॑रीण॑म॒मृत॑ः स्व॒स्ति। य॒ज्ञं  
नः पा॑न्तु वस॑वः प॒रस्ता॑त्। द॒क्षिण॑तो॒ऽभिय॑न्तु श्रवि॑ष्ठाः। पु॒ण्यं  
नक्ष॑त्रम॒भि संवि॑शाम। मा नो अ॒राति॑र॒घश॑सा॒ऽग्न॑न्॥२३॥

क्ष॒त्रस्य॑ रा॒जा वरु॑णो॒ऽधि॒राजः॑। नक्ष॑त्राणा॒ं श॒तभि॑ष॒ग्वसि॑ष्ठः।  
तौ दे॒वेभ्यः॑ कृ॒णुतो॑ दी॒र्घमा॑युः। श॒त॑ सह॒स्रा भे॑ष॒जानि॑  
धत्तः। य॒ज्ञं नो॒ राजा॒ वरु॑ण॒ उप॑यातु। तन्नो॒ विश्वे॑ अ॒भि  
संय॑न्तु दे॒वाः। तन्नो॒ नक्ष॑त्र॑ श॒तभि॑ष॒गजु॑षा॒णम्। दी॒र्घमा॑युः  
प्रति॑र॒द्वेष॑जानि॑॥२४॥

अ॒ज एक॑पा॒दुद॑गात्पु॒रस्ता॑त्। वि॒श्वा भू॒तानि॑ प्रति॒ मोद॑मानः।  
तस्य॑ दे॒वाः प्र॑स॒वं य॑न्ति॒ सर्वे॑। प्रो॒ष्ठप॒दासो॑ अ॒मृत॑स्य गो॒पाः।  
वि॒भ्राज॑मानः समि॒धा न उ॒ग्रः। आ॒न्तरि॑क्षमरु॒हद॑ग॒न्द्याम्।  
त॑ सूर्य॑ दे॒वम॒जमे॑कपादम्। प्रो॒ष्ठप॒दासो॑ अ॒नुय॑न्ति॒  
सर्वे॑॥२५॥

अहि॑र्बु॒ध्नियः॑ प्रथ॑मा न एति। श्रे॒ष्ठो दे॒वाना॑मु॒त मा॑नु॒षाणा॑म्।

तं ब्राह्मणाः सोमपाः सोम्यासः। प्रोष्ठपदासो अभिरक्षन्ति  
सर्वे। चत्वार एकमभि कर्म देवाः। प्रोष्ठपदा स इति यान्  
वदन्ति। ते बुध्नियं परिषद्यं स्तुवन्तः। अहिं रक्षन्ति  
नमसोपसद्यं॥२६॥

पूषा रेवत्यन्वेति पन्थाम्। पुष्टिपतीं पशुपा वाजंबस्त्यौ।  
इमानि हव्या प्रयता जुषाणा। सुगैर्नो यानैरुपयातां यज्ञम्।  
क्षुद्रान् पशून् रक्षतु रेवतीं नः। गावो नो अश्वां अन्वेतु पूषा।  
अत्र रक्षन्तौ बहुधा विरूपम्। वाजं सनुतां यजमानाय  
यज्ञम्॥२७॥

तदश्विनावश्वयुजोपयाताम्। शुभङ्गमिष्ठौ सुयमैभिरश्वैः। स्व  
नक्षत्रं हविषा यजन्तौ। मध्वासम्पृक्तौ यजुषा समन्तौ।  
यौ देवानां मिषजौ हव्यवाहौ। विश्वस्य दूतावमृतस्य  
गोपौ। तौ नक्षत्रं जुजुषाणोपयाताम्। नमोऽश्विभ्यां  
कृणुमोऽश्वयुग्भ्याम्॥२८॥

अप पाप्मानं भरणीर्भरन्तु। तद्यमो राजा भगवान् विचष्टाम्।  
लोकस्य राजा महतो महान् हि। सुगं नः पन्थामभयं  
कृणोतु। यस्मिन्नक्षत्रे यम एति राजा। यस्मिन्नेनमभ्यषिञ्चन्त  
देवाः। तदस्य चित्रं हविषा यजाम। अप पाप्मानं  
भरणीर्भरन्तु॥२९॥

निवेशनी सङ्गमनी वसूनां विश्वा रूपाणि वसून्यावेशयन्ती।

स॒ह॒स्र॒पोष॑ꣳ सु॒भगा॒ ररा॑णा सा न आ॒ग॒न्वर्च॑सा संविदा॒ना॥  
 यत्ते॑ दे॒वा अ॒द॒धुर्भा॑ग॒धेय॒ममा॑वास्ये सं॒वस॑न्तो म॒हि॒त्वा। सा  
 नो॑ य॒ज्ञं पि॑पृ॒हि वि॒श्ववा॑रे र॒यिं नो॑ धेहि सु॒भगे सु॑वीरम्॥ ३० ॥



नवो॑ नवो भवति जाय॑मा॒नोऽह्ना॑ के॒तुरु॒षसा॑मेत्य॒ग्रे। भा॒गं  
 दे॒वेभ्यो॑ वि॒द॒धात्या॒यन् प्रच॑न्द्रमा॒स्तिरति॑ दी॒र्घमा॑युः॥

यमा॑दि॒त्या अ॒ꣳशु॒मा॑प्या॒यय॑न्ति यम॑क्षि॒तम॑क्षि॒तयः॑ पिब॑न्ति।  
 तेन॑ नो॒ राजा॒ वरु॑णो बृह॒स्पति॑रा प्या॒यय॑न्तु भुव॑नस्य गो॒पाः॥

ये वि॒रूपे॑ सम॑नसा सं॒व्यय॑न्ती। सु॒मा॒नं तन्तु॑ परि॒तात॑नाते॑।  
 वि॒भू प्र॒भू अ॑नु॒भू वि॒श्वतो॑ हुवे। ते नो॒ नक्ष॑त्रे हव॒माग॑मेतम्।  
 व॒यं दे॒वी ब्र॒ह्म॑णा संविदा॒नाः। सुर॑त्ना॒सो दे॒ववी॑तिं दधा॑नाः।  
 अ॒होरा॒त्रे ह॒विषा॑ वर्ध॑यन्तः। अति॑ पा॒प्मान॑मति॒मुत्त्या॑गमेम।  
 प्रत्यु॑वद॒श्याय॑ती। व्यु॒च्छन्ती॑ दुहि॒ता दि॒वः। अ॒पो म॒ही वृ॑णुते  
 चक्षु॑षा। तमो॒ ज्योति॑ष्कृ॒णोति॑ सून॒री॑। उदु॒स्त्रिया॑याः सच॑ते  
 सूर्यः॑। सचा॑ उ॒द्यन्नक्ष॑त्रमर्चि॒मत्। तवेदु॑षो व्युषि॒ सूर्य॑स्य च।  
 सं भ॑क्तेन॑ गमेमहि। तन्नो॒ नक्ष॑त्रमर्चि॒मत्। भा॒नुम॑त्तेजं उ॒च्चर॑त्।  
 उप॑य॒ज्ञमि॒हाग॑मत्। प्र नक्ष॑त्राय दे॒वाय॑। इन्द्रा॒येन्दु॑ꣳ हवामहे।  
 स नः॑ सवि॒ता सु॑वत्स॒निम्। पु॒ष्टि॒दां वी॒रव॑त्तमम्।

उदु॒त्यं जा॒तवे॑दसं दे॒वं व॑हन्ति के॒तवः॑। दृ॒शे वि॒श्वाय॑ सूर्य॒म॑।  
 चि॒त्रं दे॒वाना॑मुद॒गादनी॑कं चक्षु॑र्मि॒त्रस्य॑ वरु॒णस्या॒ग्रे। आऽप्रा॑

द्यावां पृथिवी अन्तरिक्षं सूर्य आत्मा जगतस्तस्थुषंश्च।  
 आदितिर्न उरुष्यत्वदितिः शर्म यच्छतु। अदितिः  
 पात्वहंसः। महीमूषु मातरं सुव्रतानामृतस्य पत्नीमवसे  
 हुवेम। तुविक्षत्रामजरन्तीमुरूचीं सुशर्माणमदितिं  
 सुप्रणीतिम्।

इदं विष्णुर्विचक्रमे त्रेधा निदधे पदम्। समूढमस्य पांसुरे।  
 प्रतद्विष्णुः स्तवते वीर्याय। मृगो न भीमः कुचरो गिरिष्ठाः।  
 यस्योरुषु त्रिषु विक्रमणेषु। अधिक्षियन्ति भुवनानि विश्वा।  
 अग्निर्मूर्धा दिवः ककुत्पतिः पृथिव्या अयम्। अपांसि  
 जिन्वति। भुवो यज्ञस्य रजसश्च नेता यत्रानियुद्धिः  
 सचसे शिवाभिः। दिवि मूर्धानं दधिषे सुवर्षां जिह्वामग्रे  
 चकृषे हव्यवाहम्। अनुनोऽद्यानुमतिर्यज्ञं देवेषु मन्यताम्।  
 अग्निश्च हव्यवाहनो भवतां दाशुषे मयः। अन्विदनुमते  
 त्वं मन्यासै शं च नः कृधि। ऋत्वे दक्षाय नोहि नु  
 प्रण आयूषि तारिषः। हव्यवाहमभिमातिषाहम्। रक्षोहणं  
 पृतनासु जिष्णुम्। ज्योतिष्मन्तं दीद्यतं पुरन्धिम्। अग्निं  
 स्विष्टकृतं माहुवेम। स्विष्टमग्रे अभितत्पृणाहि। विश्वा  
 देव पृतना अभिष्य। उरुं नः पन्थां प्रदिशन्विभाहि।  
 ज्योतिष्मद्वेह्यजरन्न आयुः॥

अग्रये स्वाहा कृत्तिकाभ्यः स्वाहा।

अ॒म्बायै॑ स्वाहा॑ दु॒लायै॑ स्वाहा॑।  
 नि॒त॒त्यै स्वाहा॑ऽभ्रय॑न्त्यै स्वाहा॑।  
 मे॒घय॑न्त्यै स्वाहा॑ वर्ष॑यन्त्यै स्वाहा॑।  
 चु॒पु॒णीका॑यै स्वाहा॑।  
 प्र॒जाप॑तये स्वाहा॑ रोहि॑ण्यै स्वाहा॑।  
 रोच॑मानायै स्वाहा॑ प्र॒जाभ्यः॑ स्वाहा॑।  
 सोमा॑य स्वाहा॑ मृ॒गशी॑र्षाय स्वाहा॑।  
 इ॒न्व॒काभ्यः॑ स्वाहा॑ ष॒धीभ्यः॑ स्वाहा॑।  
 रा॒ज्याय॑ स्वाहा॑ऽभिजि॑त्यै स्वाहा॑।  
 रु॒द्राय॑ स्वाहा॑ऽऽर्द्रा॑यै स्वाहा॑।  
 पि॒न्व॒मानायै॑ स्वाहा॑ प॒शुभ्यः॑ स्वाहा॑।  
 अदि॑त्यै स्वाहा॑ पुन॑र्वसुभ्याम्।  
 स्वाहा॑ भू॒त्यै स्वाहा॑ प्रजा॑त्यै स्वाहा॑।  
 बृ॒ह॒स्प॒तये॑ स्वाहा॑ ति॒ष्याय॑ स्वाहा॑।  
 ब्र॒ह्म॒व॒र्च॒साय॑ स्वाहा॑।  
 स॒र्पेभ्यः॑ स्वाहा॑ऽऽश्रे॑षाभ्यः स्वाहा॑।  
 द॒न्द्शू॒केभ्यः॑ स्वाहा॑।  
 पि॒तृभ्यः॑ स्वाहा॑ म॒घाभ्यः॑।  
 स्वाहा॑ऽन॒घाभ्यः॑ स्वाहा॑ऽग॒दाभ्यः॑।  
 स्वाहा॑ऽरु॒न्ध॒तीभ्यः॑ स्वाहा॑।  
 अ॒र्य॒म्णे स्वाहा॑ फ॒ल्गु॒नीभ्या॑ऽ स्वाहा॑।  
 प॒शुभ्यः॑ स्वाहा॑।



भगा॑य॒ स्वाहा॒ फल्गु॑नीभ्या॒ऽ स्वाहा॑॥  
 श्रेष्ठा॑य॒ स्वाहा॑॥  
 स॒वि॒त्रे स्वाहा॒ हस्ता॑य॒।  
 स्वाहा॑ द॒द॒ते स्वाहा॑ पृ॒ण॒ते।  
 स्वाहा॑ प्र॒यच्छ॑ते स्वाहा॑ प्र॒तिगृ॑भ्ण॒ते स्वाहा॑॥  
 त्वष्ट्रे॑ स्वाहा॑ चि॒त्रायै॒ स्वाहा॑॥  
 चै॒त्राय॒ स्वाहा॑ प्र॒जायै॒ स्वाहा॑॥  
 वा॒यवे॒ स्वाहा॒ निष्ठा॑यै॒ स्वाहा॑॥  
 का॒म॒चा॒राय॒ स्वाहा॒ऽभिजि॑त्यै॒ स्वाहा॑॥  
 इ॒न्द्रा॒ग्निभ्या॒ऽ स्वाहा॒ वि॒शा॒खाभ्या॒ऽ स्वाहा॑॥  
 श्रेष्ठा॑य॒ स्वाहा॒ऽभिजि॑त्यै॒ स्वाहा॑॥  
 पौ॒र्ण॒मा॒स्यै स्वाहा॒ का॒माय॒ स्वाहा॒ऽऽग॑त्यै॒ स्वाहा॑॥  
 मि॒त्राय॒ स्वाहा॒ऽनू॒रा॒धेभ्यः॒ स्वाहा॑॥  
 मि॒त्र॒धेया॑य॒ स्वाहा॒ऽभिजि॑त्यै॒ स्वाहा॑॥  
 इ॒न्द्राय॒ स्वाहा॑ ज्ये॒ष्ठायै॒ स्वाहा॑॥  
 ज्ये॒ष्ठा॑य॒ स्वाहा॒ऽभिजि॑त्यै॒ स्वाहा॑॥  
 प्र॒जाप॑तये॒ स्वाहा॒ मू॒लाय॒ स्वाहा॑॥  
 प्र॒जायै॒ स्वाहा॑॥  
 अ॒द्भ्यः स्वाहा॑ऽषा॒ढाभ्यः॒ स्वाहा॑॥  
 स॒मु॒द्राय॒ स्वाहा॒ का॒माय॒ स्वाहा॑॥  
 अ॒भिजि॑त्यै॒ स्वाहा॑॥  
 वि॒श्वेभ्यो॒ दे॒वेभ्यः॒ स्वाहा॑ऽषा॒ढाभ्यः॒ स्वाहा॑॥

अ॒न॒प॒ज॒य्या॒य॒ स्वा॒हा॒ जि॒त्यै॒ स्वा॒हा॑॥  
 ब्र॒ह्म॒णे॒ स्वा॒हा॑ऽभि॒जिते॒ स्वा॒हा॑॥  
 ब्र॒ह्म॒लो॒का॒य॒ स्वा॒हा॑ऽभि॒जित्यै॒ स्वा॒हा॑॥  
 वि॒ष्ण॒वे॒ स्वा॒हा॑ श्रो॒णायै॒ स्वा॒हा॑॥  
 श्लो॒का॒य॒ स्वा॒हा॑ श्रु॒ताय॒ स्वा॒हा॑॥  
 व॒सु॒भ्यः॒ स्वा॒हा॑ श्रि॒वि॒ष्ठा॒भ्यः॒ स्वा॒हा॑॥  
 अ॒ग्रा॒य॒ स्वा॒हा॑ प॒री॒त्यै॒ स्वा॒हा॑॥  
 व॒रु॒णाय॒ स्वा॒हा॑ श॒त॒भि॒ष॒जे॒ स्वा॒हा॑॥  
 भे॒ष॒जे॒भ्यः॒ स्वा॒हा॑॥  
 अ॒जा॒यै॒क॒प॒दे॒ स्वा॒हा॑ प्रो॒ष्ठ॒प॒दे॒भ्यः॒ स्वा॒हा॑॥  
 ते॒ज॒से॒ स्वा॒हा॑ ब्र॒ह्म॒व॒र्च॒साय॒ स्वा॒हा॑॥  
 अ॒ह॒ये॒ बु॒ध्नि॒या॒य॒ स्वा॒हा॑ प्रो॒ष्ठ॒प॒दे॒भ्यः॒ स्वा॒हा॑॥  
 पू॒ष्णे॒ स्वा॒हा॑ रे॒व॒त्यै॒ स्वा॒हा॑॥  
 प॒शु॒भ्यः॒ स्वा॒हा॑॥  
 अ॒श्वि॒भ्या॒ꣳ स्वा॒हा॑ऽश्व॒यु॒ग्भ्या॒ꣳ स्वा॒हा॑॥  
 श्रो॒त्रा॒य॒ स्वा॒हा॑ श्रु॒त्यै॒ स्वा॒हा॑॥  
 य॒मा॒य॒ स्वा॒हा॑ऽप॒भ॒रणी॒भ्यः॒ स्वा॒हा॑॥  
 रा॒ज्या॒य॒ स्वा॒हा॑ऽभि॒जित्यै॒ स्वा॒हा॑॥  
 अ॒मा॒वा॒स्या॒यै॒ स्वा॒हा॑ का॒मा॒य॒ स्वा॒हा॑ऽऽग॒त्यै॒ स्वा॒हा॑॥  
 च॒न्द्र॒म॒से॒ स्वा॒हा॑ प्र॒ती॒दृ॒श्या॒यै॒ स्वा॒हा॑॥  
 अ॒हो॒रा॒त्रे॒भ्यः॒ स्वा॒हा॑ऽर्ध॒मा॒से॒भ्यः॒ स्वा॒हा॑॥  
 मा॒से॒भ्यः॒ स्वा॒ह॒र्तु॒भ्यः॒ स्वा॒हा॑॥

सं॒वत्स॒राय॒ स्वाहा॑।  
 अ॒हे स्वाहा॒ रात्रि॑यै॒ स्वाहा॑।  
 अ॒तिमु॒क्त्यै॒ स्वाहा॑।  
 उ॒षसे॒ स्वाहा॒ व्यु॑ष्ठ्यै॒ स्वाहा॑।  
 व्यु॒षुष्यै॒ स्वाहा॑ व्यु॒च्छन्त्यै॒ स्वाहा॑।  
 व्यु॒ष्टायै॒ स्वाहा॑।  
 नक्ष॑त्राय॒ स्वाहो॑दे॒ष्यते॒ स्वाहा॑।  
 उ॒द्यते॒ स्वाहो॑दि॒ताय॒ स्वाहा॑।  
 ह॒रसे॒ स्वाहा॒ भर॑से॒ स्वाहा॑।  
 भ्राज॑से॒ स्वाहा॒ तेज॑से॒ स्वाहा॑।  
 तप॑से॒ स्वाहा॒ ब्रह्म॑व॒र्चसाय॒ स्वाहा॑।  
 सूर्या॑य॒ स्वाहा॒ नक्ष॑त्रेभ्यः॒ स्वाहा॑।  
 प्र॒ति॒ष्ठायै॒ स्वाहा॑।  
 अ॒दित्यै॒ स्वाहा॑ प्र॒ति॒ष्ठायै॒ स्वाहा॑।  
 वि॒ष्णवे॒ स्वाहा॑ य॒ज्ञाय॒ स्वाहा॑।  
 प्र॒ति॒ष्ठायै॒ स्वाहा॑॥

द॒धि॒क्राव्णो॑ अ॒कारि॑षं जि॒ष्णोर॑श्व॒स्य वा॒जिनः॑। सु॒र॒भि नो॒  
 मुखा॑कर॒त् प्रण॒ आयू॑षि तारिषत्॥

आपो॑ हि ष्ठा म॒यो भुव॑स्तान॒ ऊ॒र्जे द॑धातन। म॒हेर॑णाय॒  
 चक्ष॑से॥

यो वः शिवतमो रसस्तस्य भाजयतेह नः। उ॒श॒तीरि॑व  
मातरः॥

तस्मा अरं गमाम वो यस्य क्षयाय जिन्वथ। आपो ज॒नय॑था  
च नः॥

उदु॑त्त॒मं व॑रुण॒पाश॑म॒स्मदवा॑धु॒मं वि॑म॒ध्य॒मं श्र॑थाय। अथा  
व॒यमा॑दित्यव्र॒ते तवा॑ना॒गसो॑ अ॒दित॑ये स्याम। अस्त॑भ्राद्  
द्यामृ॑ष॒भो अ॒न्तरि॑क्षममिमीत वरि॒माणं॑ पृथि॒व्या आसी॑द॒द्विश्वा॑  
भुव॑नानि स॒म्राड्वि॑श्वे॒त्तानि॑ वरुणस्य व्र॒तानि॑।

यत्किं चेदं वरुण दैव्ये जने॑भिद्रोहं मनु॒ष्याश्च॑रा॒मसि॑।  
अचि॑त्ती॒यत्तव॑ धर्मा यु॒योपि॑म मा न॒स्तस्मा॑दे॒नसो॑ देव  
रीरिषः॥

कि॒त॒वासो॑ यद्रि॒रि॒पुर्नदी॑वि यद्वा॑ घा स॒त्यमु॑त यं न वि॒द्म।  
सर्वा॑ताविष्य॑ शिथि॑रेव दे॒वाथा॑ ते स्याम वरुण प्रि॒यासः॑॥

अव॑ ते हेडो॑ वरुण॒ नमो॑भिरव॒यज्ञेभि॑रीमहे ह॒विर्भिः॑।  
क्षय॑न्न॒स्मभ्य॑मसुरप्रचेतो॒ राज॒न्नेना॑सि॒शिश्र॑थः कृ॒तानि॑॥

तत्त्वा॑ यामि॒ ब्रह्म॑णा॒ वन्द॑मान॒स्तदाशा॑स्ते यज॑मानो ह॒विर्भिः॑।  
अहे॑डमानो वरुणे॒ह बो॑ध्युरु॒शस॑ मा न॒ आयुः॑ प्रमोषीः॥

हिर॑ण्यवर्णाः शुच॑यः पाव॒का यासु॑ जा॒तः क॒श्यपो॑ यास्विन्द्रः॑।  
अ॒ग्निं या॑ गर्भं दधि॑रे विरू॒पास्ता॑ न॒ आपः॑ श॒ स्यो॒ना

भ॑वन्तु॥ यासा॒ः राजा॒ वरु॑णो॒ याति॒ मध्ये॑ स॒त्यानृ॑ते अ॒वप॑श्यं  
 जना॑नाम्। म॒धुश्चु॑तः शुच॑यो॒ याः पा॑व॒कास्ता न॒ आपः॑ शः  
 स्यो॒ना भ॑वन्तु॥ यासा॑ दे॒वा दि॒वि कृ॑ण्वन्ति॒ भ॒क्षं या अ॒न्तरि॑क्षे  
 बहु॑धा भव॑न्ति। याः पृ॒थि॒वीं पय॑सो॒न्दन्ति॑ शु॒क्रास्ता न॒ आपः॑  
 शः स्यो॒ना भ॑वन्तु॥ शि॒वेन॑ मा॒ चक्षु॑षा पश्यताऽऽपः शि॒वया॑  
 त॒नुवो॑प॒ स्पृश॑त॒ त्वचं॑ मे। सर्वा॑ः अ॒ग्नीः र॑प्सुषदो हुवे वो  
 मयि॒ वर्चो॑ बल॒मोजो॑ नि ध॑त्त॥

पव॑मानः सुव॒र्जनः॑। प॒वित्रे॑ण॒ विच॑र्षणिः। यः पो॒ता स  
 पु॑नातु मा। पु॒नन्तु॑ मा दे॒वज॑नाः। पु॒नन्तु॑ मन॑वो धि॒या।  
 पु॒नन्तु॑ वि॒श्वं आ॒यवः॑। जा॒तवे॑दः प॒वित्र॑वत्। प॒वित्रे॑ण पु॒नाहि॑  
 मा। शु॒क्रेण॑ दे॒वदी॑द्यत्। अ॒ग्ने ऋ॒त्वा ऋ॒तूँ र॑नु। य॒त्ते  
 प॒वित्र॑म॒र्चिषि॑। अ॒ग्ने वि॒त॑तमन्त॒रा। ब्र॒ह्म ते॑न॒ पुनी॑महे।  
 उ॒भाभ्या॑ दे॒वस॑वितः। प॒वित्रे॑ण स॒वेन॑ च। इ॒दं ब्र॒ह्म पु॑नीमहे।  
 वै॒श्वदे॒वी पु॑न॒ती दे॒व्यागा॑त्। य॒स्यै ब॒ह्वीस्त्त॑नुवो वी॒तपृ॑ष्ठाः।  
 तया॒ मद॑न्तः सध॒माद्यै॑षु। व॒यः स्या॑म॒ पत॑यो रयी॒णाम्।  
 वै॒श्वान॑रो र॒श्मिभि॑र्मा पु॒नातु॑। वा॒तः प्रा॒णेनै॑षिरो म॒यो भूः।  
 द्यावा॑पृथि॒वी पय॑सा॒ पयो॑भिः। ऋ॒ताव॑री य॒ज्ञिये॑ मा पु॒नीता॑म्।  
 बृ॒हद्भिः॑ स॒वित॑स्तृभिः। व॒र्षिष्ठै॑र्दे॒वम॑न्म॒भिः। अ॒ग्ने दक्षैः॑ पु॒नाहि॑  
 मा। येन॑ दे॒वा अपु॑नत। येनऽऽपो॑ दि॒व्यं क॑शः। तेन॑  
 दि॒व्येन॑ ब्र॒ह्मणा॑। इ॒दं ब्र॒ह्म पु॑नीमहे। यः पा॑व॒मा॒नीर॒ध्येति॑।  
 ऋ॒षिभिः॑ स॒म्भृ॑त॒ रस॑म्। सर्व॑ स पू॒तम॑श्नाति। स्व॒दि॒तं

मा॒त॒रि॒श्व॒ना। पा॒व॒मा॒नी॒र्यो अ॒ध्येति॑। ऋ॒षि॒भिः सम्भृ॑तः॒  
 रस॑म्। तस्मै॒ सर॑स्वती दु॒हे। क्षी॒रः सर्पि॑र्मधू॒दक॑म्॥  
 पा॒व॒मा॒नीः स्व॒स्त्यय॑नीः। सु॒दु॒घा॒हि प॒र्य॑स्वतीः। ऋ॒षि॒भिः  
 सम्भृ॑तो रसः। ब्रा॒ह्म॒णेष्व॑मृतः॒ हित॑म्। पा॒व॒मा॒नीर्दि॑शन्तु नः।  
 इ॒मं लो॒कम॑थो अ॒मुम्। का॒मा॒न्त्सम॑र्धयन्तु नः। दे॒वीर्दे॒वैः  
 स॒माभृ॑ताः। पा॒व॒मा॒नीः स्व॒स्त्यय॑नीः। सु॒दु॒घा॒हि घृ॑त॒श्चुतः॑।  
 ऋ॒षि॒भिः सम्भृ॑तो रसः। ब्रा॒ह्म॒णेष्व॑मृतः॒ हित॑म्। येन॑  
 दे॒वाः प॒वित्रे॑ण। आ॒त्मानं॑ पु॒नते॒ सदा॑। तेन॑ स॒हस्र॑धा॒रेण।  
 पा॒व॒मा॒न्यः पु॑नन्तु मा। प्रा॒जा॒प॒त्यं प॒वित्र॑म्। श॒तो॒द्या॑मः॒  
 हि॒र॒ण्म॒यम्। तेन॑ ब्र॒ह्म वि॒दो व॑यम्। पू॒तं ब्र॒ह्म पु॑नीमहे। इन्द्रः॑  
 सु॒नी॒ती स॒हमा॑ पु॒नातु॑। सोमः॑ स्व॒स्त्या व॑रुणः स॒मी॒च्या।  
 य॒मो रा॒जा प्र॑मृ॒णाभिः॑ पु॒नातु॑ मा। जा॒तवे॑दा मो॒र्जय॑न्त्या  
 पु॒नातु॑। भूर्भुवः॒ सुवः॑।

तच्छ्रुं॑ यो॒रावृ॑णीमहे। गा॒तुं य॒ज्ञाय॑। गा॒तुं य॒ज्ञप॑तये।  
 दै॒वी॑स्स्व॒स्तिर॑स्तु नः। स्व॒स्तिर्मा॑नु॒षेभ्यः॑। ऊ॒र्ध्वं जि॑गातु  
 भे॒ष॒जम्। श॒न्नो अ॑स्तु द्वि॒पदे॑। शं चतु॑ष्पदे। ॐ शान्तिः॒  
 शान्तिः॒ शान्तिः॑॥

नमो॑ ब्र॒ह्म॒णे नमो॑ अ॒स्त्व॒ग्नये॑ नमः॑ पृथि॒व्यै नम॑ ओष॒धीभ्यः॑।  
 नमो॑ वा॒चे नमो॑ वा॒चस्प॑तये॒ विष्ण॑वे बृ॒हते॑ क॒रोमि॑॥

॥ ॐ शान्तिः॒ शान्तिः॒ शान्तिः॑॥

## ॥ प्रोक्षण मन्त्राः ॥

आपो हि ष्ठा मयो भुवस्ता न ऊर्जे दधातन। मुहेरणांय  
चक्षसे। यो वः शिवर्तमो रसस्तस्य भाजयते ह नः।  
उशतीरिव मातरः। तस्मा अरं गमाम वो यस्य क्षयाय  
जिन्वथ। आपो जनयथा च नः॥

देवस्य त्वा सवितुः प्रसवे। अश्विनोर्बाहुभ्याम्। पूष्णो  
हस्ताभ्याम्। अश्विनोर्भैषज्येन। तेजसे ब्रह्मवर्चसायाभिषिञ्चामि॥

देवस्य त्वा सवितुः प्रसवे। अश्विनोर्बाहुभ्याम्। पूष्णो  
हस्ताभ्याम्। सरस्वत्यै भैषज्येन। वीर्यायान्नाद्यायाभिषिञ्चामि॥

देवस्य त्वा सवितुः प्रसवे। अश्विनोर्बाहुभ्याम्।  
पूष्णो हस्ताभ्याम्। इन्द्रस्येन्द्रियेण। श्रिये यशसे  
बलायाभिषिञ्चामि॥

देवस्य त्वा सवितुः प्रसवेऽश्विनोर्बाहुभ्यां पूष्णो हस्ताभ्यां  
सरस्वत्यै वाचो यन्तुर्यत्रेणाग्नेस्त्वा साम्राज्येनाभिषिञ्चामि॥

देवस्य त्वा सवितुः प्रसवेऽश्विनोर्बाहुभ्यां पूष्णो  
हस्ताभ्यां सरस्वत्यै वाचो यन्तुर्यत्रेण बृहस्पतेस्त्वा  
साम्राज्येनाभिषिञ्चामि॥

द्रुपदादिव मुञ्चतु। द्रुपदादिवेन्मुमुचानः। स्विन्नः स्नात्वी  
मलादिव। पूतं पवित्रेणेवाज्यम्। आपः शुन्धन्तु मैनसः।

आपो वा इदं सर्वं विश्वा भूतान्यापः प्राणा वा आपः

प॒शव॒ आपोऽन्न॒मापोऽमृत॑मापः॑ स॒म्राडा॑पो वि॒राडा॑पः॑  
 स्व॒राडा॑प॒श्छन्दा॑ꣳस्यापो॒ ज्योती॑ꣳष्यापो॒ यजूꣳष्यापः॑  
 स॒त्यमा॑पः॒ सर्वा॑ दे॒वता॒ आपो॑ भूर्भुवः॒ सुव॒राप॒ ओम्॥  
 ॥ॐ शान्तिः॒ शान्तिः॒ शान्तिः॑॥